

Ebedeoidi ïnänite cadota ante näni yewæmongainta

*Wængongui^ü beyæ tömengä Wengä pönö
apænegacäimpa*

¹ Wængongui wëenëñedë wantæ wantæ ïñö apænedinque wantæ ïñö wadö baï cædinque wantæ ïñö wadö baï cædinque tömengä beyæ në apænedäni ïnänite tæmpo pönö apænecä ëñengadänimpa. Ëñeninque tömänani wæætë adodö ante mönö mæmæidi ïnänite tæmpo apænegadänimpa.

² Nöwo guiquenë mäninö ante Wængongui dodäni ïnänite nänö apænegaïonæ idæwaa bayonte tömengä apænecä ëñeninque tömengä Wengä wæætë mönö ìmonte pönö apænegacäimpa. Wëenë poni inguipoga dæ ii ëmönæ dæ äñonte Wæmpocä tömengä Wengä ingante, Badöe, angä ëñente cæyongä tömengä nänö cædö beyæ Wæmpocä tömancoo badongacäimpa. Mänömai beyæ në badongä ïñongante Mæmpo Wængongui wæætë, Tömancoo në ænguingä ïñömö botö Wengä adocanque në ænguingä ingampa ämopa, angacäimpa. ³ Mæmpocä në tæi ëmönongä inte ñäö ëmongä ïñongä tömengä Wengä ïñömö adobaï në tæi ëmönongä inte ñäö ëmongä ingampa. Ìnique, Wængongui Wengä nö poni entawëninque nänö quëwengaïnö baï Mæmpocä ïñömö edæ adobaï poni entawënongä inte edæ nöingä cæte quëwengä

ingampa, ante mönö edonque ëñengæimpa. Ínguipo incæ ii ëmönæ incæ a ongoncoo incæ awëmö iñömö ongoncoo incæ tömengä Wengä adocä tæi piñænte nänö angäinö beyænque tömancoo edæ ñöwo ganca cöwë ongoncoo incoopa. Ayæ nämä wepæ godonte wæninque adocä iñömö wënæ wënæ mönö cæpämø ante ñä mënongagacäimpa. Mänömaï né ñä mënongaingä iñongä inte tömengä do æidinque Wængongui né tæi ëmongä tömämëngä iñö tæ contadinque ongongampa.

Tömengä ñcënængä iñongä anquedoidi pönömenque ñäni

⁴ Mänömaï æi contadinque tömengä né ñænængä iñongante Wængongui iñömö, Bitö ëmöwo bitö cöwë ænguenengaïwo, ante pemongacäimpa. Wængongui anquedoidi guiquenë wii adobaï ñænænäni iñönänite Wængongui tömänäni ñänite adobaï ante pemönämaï ingacäimpa. ⁵ Edæ anquedoidi iñönänite æcämenque ingante Wængongui dicæ, “Botö Wëmi iñömi imipa.

Ñöwoönæ bitö Mæmpobo babopa,”
Ante angantawogaa. Ayæ adobaï,
“Botö tömengä Mæmpobo incæboimpa.

Ínique tömengä botö Wengä incæcäimpa,” ante
anquedo ingante änämaï ingacäimpa.

⁶ Wæætë tömengä Wengä Tänocä iñongante inguipoga da pönöninque Wængongui,
“Botö anquedoidi tömänäni iñgä öñöwa iñö ædæ
wææninque, Bitö Wængongui Wëmi imidö
anguenë, ante watapæ apænecædänimpa,”
ante apænegacäimpa.

7 Ayæ wæætë anquedoidi ïnänitedö ante apænedinque,

“Tömengä godö cæcä ate tömengä anquedoidi ïñömö woboyæ nanguï pæmæ baï quingæ pöni cæcædänimpa.

Ayæ tömengä godö cæcä ate tömengä beyæ né waa cædåni ïñömö gonga bæcoguënëwate baï nanguï cæcædänimpa.”

8 Ante apænedinque tömengä Wengä ingante guiquenë Wængonguï incæ ïimaï angacäimpa.

“Bitö né Wængonguï ïnömi inte ëñëmi. Awënë Od-eye badinque Awënë contaimpaa tæ contagaïmi inte bitö ñimpo cædämaï inte cöwë Awënë Odeyebi ïnömi inte ongoncæbiimpa.

Ïnique Awënë Odeyebi ïnömi inte bitö nempo quëwënäni ïnänite nö pöni cæte aadinqe yaëmë töëmë pöni næænte baï né ämi incæbiimpa.

9 Né Wængonguïmo ïnömo inte botö ïñömö bitö Awënë Wængonguïmo ïmpa. Ïnique botö, Nö cæte mönö quëwenguïnö ante né waadebi ïnömi inte bitö ëñënämaï näni cæinö ante edæ wii aïnëmi ïmpa.

Mänömaï ïmi ante adinqe botö ïimaï pönö cæbopa.
Bitö tönö godongämæ ongönäni Awënë badinque bitö watapæ tocæbiimpa, ante cædinque botö,

oguinguipæ pönö gao caate baï nanguï cægaboimpa.”

10 Ante Mæmpo Wængonguï angacäimpa. Ayæ adobaï tömengä Wengä ingante apænedinque,

“Bitö Tæiyæ Awënë ïnömi inte wëenëñedë pöni
inguipo mä cö cæte baï cædinque tömëmi
badongabiimpa, angacäimpa.

Ayæ öönædë ongoncoo adobaï tömëmi bitö
önompoca badongaincoo inte ongoncoopa.

11 Mänincoo guiquënë iincayæ ate wido cæte baï
bayonte

Bitö guiquënë cöwë ongongüimi ïmipa.

Mänincoo guiquënë mönö weocoo pedæncoo woin-
coo baï bayonte,

12 waocä yacooque æninque topo cæcä baï
cædinque bitö wæætë bitö badongaincoo
ænte topo cæte baï cæcæbiimpa.

Wæætë müinc oo wëñacä baï cædinque bitö wæætë
tömancoo müinc oo badömi ongongæimpa.

Bitö ïñömö do bitö ingaï baï adobaï cöwë inguümi
ïmipa.

Bitö quëwenguümämo cöwë inguünö anguënë.”

13 Äninque Wængonguü tömengä Wengä ingante
ïimaï angacäimpa.

“Botö tömämæ ïnö tæ contate ongoñömite,
botö bitö ïmite në pii te cædäni ïnänite bæ tabo
tæ wæænäni ate bitö tæï èmömi inte pñä
gäwate baï godö cæbi wæcædänimpa,” an-
gacäimpa.

Tömengä Wengä ingante mänömaïnö ante në
angatingä inte Wængonguü dicæ anquedoidi ïnänite
adobaï angantawogaa. **14** ïñæmpa Wængonguü
anquedoidi ïñömö baö ömaadäni inte Wængonguü
beyæ në waa cædäni ïnänipa. Mänömaï ïñönänite
tömengä, Botö æmo beyænque në quëwënäni

beyæ münitö godö cæcæmïnimpa, ante da pönongä pöninque tömënäni mönö beyæ pönö waa cædänipa.

2

Wængonguï œngä beyænque quëwëmompa, ante

¹ Mänömaï beyæ mönö Awënë apænecä ëñenique mönö ëñengaïnö ante mönö ñimpo cædämäï inguinque ante mönö wede pönente ædæmö ëñente cæcæimpä. ² Edæ anquedoidi incæ Wængonguï beyæ apæneyönäni tömënäni näni äno ante dodäni wæætë né ëñente cæquënenäni ingadänimpa. Ìnique æcänö wii ëñenique wapiti cæda tömengä né tente wæquënengä iñongante dodäni nö cædinque pangadänimpa.

³ Ìñänäni ëñeedäni. Wængonguï näno, Quëwencæmïnimpa, ante angainö ante æcänö mönö imonte täno apænecantawo, ante pönëedäni. Wængonguï Awënë ìnongä incæ tänocä apænegaingä inte, Botö tömëmo ðmo beyænque quëwencæmïnimpa, ante apænegacäimpä. Ayæ Wængonguï näno apænegaïnö ëñente Ao änique wadäni godömenque mönö imonte, Näwangä impa, ante apænedäni ëñenimö inte mönö ædæmö ëñengæimpä. Edæ ëñenämaï inte baï ñimpo cæmö ìnique Wængonguï dicæ pänämaï inte ata cæpocampa quëwenguïmöö.

⁴ Ìnique, Quëwencæmïnimpa, ante näwangä botö änö ante ëñencædänimpa, ante cædinque Wængonguï godömenque cægacäimpä. Tömengä, Æcänö tönö cæquïmoo, ante, Æyömönö cæquïmoo, ante, Æyedënö cæquïmoo, ante nämä näno angainö baï cædinque iïmaï pönö cægacäimpä. Tömengä,

Botö mä cæbo ate waodäni ëñencädänimpa, ante nanguï cægacäimpa. Ayæ, Æbänö cæcää, ante wæcädänimpa, ante tæï piñäeninqwe wadö wadö cædinque bamönengæ edæ nanguï cægacäimpa. Tömengä Önöwoca ingante da pönongä pöninque tömengä wæætë Wængonguï nänö angaïnäni ïnänite pönö cæcä æninque tömänäni tömänäni Wængonguï Önöwoca nänö pönongä ænganca cægadänimpa. Ìnique Wængonguï mänömaï pönö cæcä adimö incæ mönö ëñenämaï cämö bai tömengä wæætë mönö ìmonte ædö cæte ata cæpoquénengää.

Itota Codito tömengä töniñadäni baï adobaï bagacäimpa

⁵ Ayæ münguipoga Awënë nempo mönö quëwenguümämo ante apænemönipa. Ìnique münguipoga möni änonguipoga Wængonguï, Æcämenque ingante ämo awënë baquingä, ante cædinque, Anquedoidi incæ awënëidi bacädänimpa, ante dicæ angantawogaa. ⁶ Wacä wataa yewæmöninque ïïmaï ante Wængonguï ingante ämotamini ante baï yewæmongacäimpa.

“Wængonguï ëñëmi. Waomöni önomöni que ïñomönite bitö ædö cæte waadete cæbii.

Wao wëmöni ëñagaïmöni ïñomönite bitö ædö cæte pönö waadete cæbii.

⁷ Anquedoidi ïnänite æmonga ææntodöninqwe bitö waocä ingante gao wænö gö cæbi ate tömengä wantæ ïñö pönömenque ongongantapa.

Ayæ, Waocä në tæï ëmönongä inte ñääö
ëmöñongante wadäni tömengä ingante waa
acædänimpa, ante pönö badongabiimpa.

⁸ Edæ bitö badongaincoo tömancoo waocä nempo
pönömi æninque

waocä tæï ëmongä inte në angä bagacäimpa.”

Ante nänö yewæmongaïne baï cædinque Wængonguï tömengä nänö badongaincoo tömancoo Waocä nempo pönongä æninque Waocä në angä bayongä wacoo wayömö ongoncoo edæ dæ ampa. Incæte, Tömengä nempo tömancoo do ongompa, ante mönö ñöwo ganca ayæ adämaï ïmompa. ⁹ Doyedë mönö waocabo ïñömonte Wængonguï waadete pönö cædinque Itota ingante angä ëñeninque tömengä wæætë mönö tömämö wænguümämo beyæ ante cöwë wæwocate wæquingä bagacäimpa. Mänömaï cædinque Wængonguï anquedoidi ïnänite æmonga ææntodöninque, Itota wæætë caate wæncæcäimpa, ante cædinque tömengä ingante gao wænö ïñömö gönongä ongongacäimpa. Incæte Itota caate wængä beyæ Wængonguï poganta tæiyæ waëmö da wencate baï cædinque, Itota në tæï ëmönongä inte ñääö ëmongä adinque wadäni tömengä ingante waa acædänimpa, ante pönö cægacäimpa. Ìnique Itota Tæiyæ Awënë wencate ongongä ingante do amompa.

¹⁰ Tömancoo në badongaingä ïnongä inte Wængonguï tömancoo në ënempodongä inte ïimaï angacäimpa. Botö Wëmi ëñëmi. Wadäni incæ botö wënäni nanguï ïnäni quëwencædänimpa, ante në badömi bitö baquinque caate wæcæbiimpa. Mänömaï caate bitö wædö beyænque ædæmö

picæmi bate nē ëñenëimi inte bitö botö wënäni ïnänite ñääö iñömö ænte mämömi poncædänimpa. Pöninque tömenäni botö ñääö ëmëmo baï adobaï ñääö ëmoncædänimpa, ante Wængonguï nö pöni cægacäimpa. ¹¹ Itota mönö ïmonte, Tæiyæ waëmö ëwocate quëwencæminimpa, ante nē badongä iñongä mönö tömengä tönö adomö mönö cabø ïmompa. Mänömaï ïmö beyæ tömengä mönö ïmonte ante apænedinque, Botö töniiñamïni ïmïnipa, ante guïñenedämaï tedecampa. ¹² ïimaï ante apænecampa.

“Wængonguï ëñëmi. Bitö ëmöwo ante botö töniñadäni ïnänite apænebo ëñencædänimpa. Tömenäni godongämæ ongonte ëñëñönäni botö, Wængonguï iñömö Tæiyæ Waëmö iñongä inte waa pöni cæcä abopa, ante ämotamïni ante baï ancæboimpa.”

¹³ Ayæ adobaï apænedinque,
“Wængonguï ingante botö wede pönente quëwencæboimpa,” angacäimpa.

Ayæ wæætë adobaï apænedinque,
“Wængonguï botö ïmote apænedinque, Bitö wënäni, ante pönongä ænömo inte botö, Moni wencabo mæ ongömöni aedäni, ämopa.”

Itota incæ Wængonguï beyæ näni yewæmongaïnö baï adobaï apænecampa.

¹⁴ Mönö wænguïmämo ante wënæ awënë incæ nē angä iñongante Itota, Botö näñe wæninque tömengä ingante edæ ömæe ëwencæboimpa, ante ïimaï cægacäimpa. Mönö Itota wëñæmö iñömö inte mönö baö tönö wepæ ñömænguïñö ëñamö baï tömengä nänö wænguinque adobaï ñömænguïñö

ëñagacäimpa. Ìninque tömengä nämä nänö wænö beyænque wénæ awënë ingante bæ tacä ate tömengä wæætë piñænämäi aquii bate në angä ìnämäi ingampa. ¹⁵ Ayæ wénæ awënë nempo ñä cæyænte baï quëwëninque mönö wænguimämo ante guïñente wæyömonte Itota mönö beyæ ante wæætë wæninque mönö ïmonte gä pe æmpote ö ãngä beyænque quëwëmompa.

¹⁶ Edæ wii anquedoidi ìnänite ænte pæ mancæte ante cædinque tömengä wæætë Abadäö wodi pæimö ïñömonte mönö ïmonte pönö ñenique pæ mangampa. ¹⁷ Mäninö beyæ Wængongui, Bitö tönïñadäni baï adobaï badinque bitö, Wængongui qui, ante në nö Pönömi Nænæmi poni incæbiimpa. Ayæ bitö tönïñadäni ìnänite cöwë pönëninque waadete pönö waa cædinque ædæmö aacæbiimpa, ante tömengä ingante da pönongä pongacäimpa. Ayæ adobaï, Bitö tömänäni wénæ wénæ nani cædö beyæ nämä wepæ godoncæbiimpa, ante cædinque Wængongui Itota ingante da pönongä pöninque tömengä mönö ëñamö baï adobaï ëñadinque waomö mönö ìnömö baï adobaï badinque Waocä ìnongä ingacäimpa. ¹⁸ Mönö inguipoga quëwëninque wénæ wénæ mönö cæinënö beyæ wæwëmompa. Wénæ awënë, Itota oda cædinque Wængongui ingante ëñenämäi cæcæcäimpa, ante cæyongä Itota ïñömö mönö wæwënö baï adobaï wæwengä incæte oda cædämaï ingacäimpa. Ìninque wénæ wénæ cæinente wæwëñömonte tömengä adobaï do wægaingä inte, Minitö tæi piñænte ongöninque oda cædämaï incæmïnimpa, ante pönö töö æmænte cæcampä.

3

Itota Ñænængä iñongä Möitee wodi wædangä ingacäimpa

¹ Mönitö ïmönite aa pedinque Wængonguï münitö ïmïnite adobaï aa pedinque, Tæiyæ waëmö entawencæmïnimpa, ante badongacäimpa. ïnique botö töniñamïni ëñeedäni. Itota iñömö Wængonguï nänö në da pönongaingä ingacäimpa, ante mönö pönënö ante mönö, Nåwangä impa, ante apænemompa. Ayæ, Wængonguï qui, ante në Godongä Ñænængä pöni iñömö Itota adocä ingampa, ante mönö pönënö ante, Nåwangä impa, ante apænemompa. ïnique münitö guiquenë, Itota æbänö ingacäimpa, ante öñowënenque pönente quëwenguënmïni ïmïnipa. ² Wængonguï angä ëñeninqüe Möitee wodi guiquenë tömengä ingante cöwë pönente cædinque Wængonguï töno näni godongämæ quëwencabo ïnänite ædæmö cæte aagacäimpa. Tömengä nö cæte nänö aagaï baï adobaï cædinque Itota iñömö Wængonguï angä ëñeninqüe tömengä ingante cöwë pönente cædinque tömengä töno mönö godongämæ quëwencabo ïmonte ædæmö cæte aacantapa.

³ Edæ, Oncö waa ongompa, ante waa amö incæ mönö oncö në badöningä ingante godömenque waa ate apænecæimpa. Adobaï, Möitee wodi në waa aacä ingacäimpa, ante tömengä ingante waa amö incæ mönö edæ Itota në badongaingä ingante godömenque nanguï waa ate apænecæimpa. ⁴ Waocä oncö guiquenë wii tömenque ongompa. Edæ waocä mænongä ate oncö edæ ongö amïnipa. Inguipo incæ adobaï öönædë ongoncoo adobaï

wïï tömenque ongoncoopa. Mänincoo tömancoo Wængonguiï nänö badongaincooque ongoncoo acæimpa. ⁵ Möitee wodi guiquenë Awënë Wængonguiï ingante né cæcä ïnongä inte tömengä tönö näni godongämæ quëwencabo ïnänite cöwë pönéninque ædæmö cæte aagacäimpa. Mänömaï cædinque tömengä, Wængonguiï æbänö iincayæ ate apænequingää, ante odömöninque, Nåwangä impa, ante apænegacäimpa. ⁶ Mönö Codito guiquenë Wæmpocä Wengä Onguiñængä ïnongä inte Wæmpocä tönö näni godongämæ quëwencabo ïnänite cöwë pönente nöingä pöni cæte pönö aacampa. Edæ mönö guiquenë, Codito waa pöni pönö cæcä beyænque watapæ bacæimpa, ante mönö pönénö ante wadäni ëñëñönäni waa tote apænemompa. ïnique mönö guïñenämaï inte mäninö mönö pönénö ante ædæmö entawéninque ïnque baganca ñimpo cædämaï ïmö ïnique tömengä tönö mönö godongämæ quëwencabo ïmaïmompa.

Wængonguiï quïnäni näni guëmanguïmämo ante

⁷ Mänömaï beyæ Wængonguiï Tæiyæ Waëmö Önöwoca nänö angaïnö ante mönö ëñente cæcæimpa. Tömengä nänö apænegaïnö ante ïimaïnö ante yewæmongatimpa.

“Ñöwoönæ incæ tömengä apænecä ëñéninque,

⁸ münitö, Mïmö ömædë bawëñämaï incæmönimpa, ante cædinque Baa änämaï iedäni.

Dodäni ïñömö, Wido cæcæimpa, ante näni önomæca quëwente cæyedë, Wængonguiï ingampa diyæ panguingää, ante pönéninque wïwa cægadänimpa. Mänömaï cædinque töménäni Baa ante mïmö

ömædënäni näni bawengaï baï münitö adobaï bawëñamaï iedäni.

9 Münitö mæmæidi mäniñömö quëwëninque botö ïmote wïwa cädäni wægaboimpa.

Incæte botö mäniñedë coadenta wadepo iñonte waa cæbo agadänimpa.

10 Mäniñedë quëwënäni mänömaï cädäni beyæ botö tömënäni ïnänite pünnique iïmaï angaboimpa.

‘Botö taadö goquënënäni incæ taadö cöwë adämaï ïnäni inte tömënäni ancaa oda cædinque mïmö ömædënäni inte baï wadö godänipa.’

11 Äninque botö ænguï badinque, Botö në Quëwëmo ingaïmo inte nöingä ämopa, äninque, Guëmäedäni, ante botö angaïñömö tömënäni cöwë guiite guëmänämaï incædänimpa, angaboimpa.”

Ante Wængonguï nänö angaïnö ante yewæmongadänimpa.

12 Iñänäni èñeedäni. Mïni pönencabo iñöminite münitö wacä ingä wacä ingä waa adinque adocanque incæ mïmö ömædengä badämaï incæcäimpa, ante wææ aaedäni. Ayæ adocanque incæ wënæ wënæ entawengä badinque wiya æmænte Wængonguï në Quëwengä ingante èmö cæte godämaï incæcäimpa, ante wææ aaedäni.

13 Nöwoönæ, ante në angä nänö angaïönæ iñömö ayæ nöwo ganca èönæpa. Iñinque münitö nöwoönæ incæ wacä ingä wacä ingä ædæmö apænedinque, Æcämenque incæ wïwa näni cædö beyænque oda cæte wædinque mïmö ömædengä badämaï incæcäimpa, ante cædinque iïmö iñö iïmö iñö

godongämæ ïñacabo cædinque tæï ongöedäni.
14 Edæ mönö wëenëñedë wede pönengamöimpa. Nöwo adobaï pönënique ïnque baganca wede pönämö ïnique mönö Codito nempo godongämæ quëwëmaïmoma.

15 ïnique adode ante pönente cæcæimpa.
 “Nöwoönæ incæ tömengä apænecä ëñëningue münitö, Mönitö mümö ömædämöni bawënamäi incæmönimpa, ante wææ cædinque Baa änämäi iedäni.

Edæ dodäni, Wido cæcæimpa, ante cædinque edæ Baa ante mümö ömædënäni näni bawengaï baï münitö adobaï bawënamäi iedäni.”

16 Wængonguï angä önomoncaque ëñëningue, Wido cæcæimpa, ante ædänidö cægadänii. Edæ Möitee wodi Equitobæ nänö né ænte gogaïnäni adodäni incæ, Wido cæcæimpa, ante cægadänimpa. **17** Ayæ adobaï Wængonguï coadenta wadepo ïñonte ædänidö ïnänite piñningue ænguï bagacäi. Edæ né ëñënamäi inte wënæ wënæ cædäni ïnänite Wængonguï piñte ænguï bacä ate tömënäni baö ingaï önomæca yabæque wæænte öñongatimpa.

18 Ayæ, Pö guiite guëmäedäni, ante botö angaiñömö cöwë guiite guëmänämäi incædänimpa, ante Wængonguï, Botö né Quëwëmo ïnömo inte nöingä angaboimpa, angacäimpa. Edæ ædänidö ïnänite mänömaï angacäi. Edæ né ëñënamäi cædäni ïnänite mänömaï angacäimpa. **19** ïnique né pönënämäi ïnäni inte tömënäni näni pönënämäi ïnö beyænque guiidämaï ingadänimpa.

4

1 Botö nempo guiidinque guëmancæmïnimpa,

“Botö ænguiï badinque, Botö në Quëwëmo ingaïmo
inte ämopa, änunque,

Pö guiite guëmäedäni, ante botö angaïñömö
tömänäni cöwë guiidämaï incædänimpa,
angaboimpa.”

Ante Wængonguï beyæ ante yewæmongadänimpa. Incæte doyedë inguipoga ii ëmönæ badöningue Wængonguï tömengä nänö cæquenënö ante iinque badöningue, Idæwaa, angacäimpa. ⁴ Wængonguï önompo æmæmpoque go adoönæque iñonte iinque cædinque ümö wæiyö nänö guëmangalöñæ ingatimpa, ante ümaï ante wataa yewæmonte ongompa.

“Önomo^p æmæmpo^que go adoönæque ïñonte
ïinque cædinque ïimö wæiyö ñimp^o cædinque
Wængongui^ü guëmangacäimpa.”

⁵ Ayæ botö äninta adotaa ïïmaï ante yewæmonte ongompa.

“Pö guuite guëmäedäni, ante botö äñömö tömënäni cöwë guiidämaï incädänimpa,” angampa, ante yewæmongatimpa.

⁶ Înique Wængongui nänö pönö cædö ante watapæ ante apænecä eñeninque dodäni iñömö önömoncaque eñenäni inte tömënäni näni eñenämaï cægalnö beyæ guiidämaï ingadänimpa. Înique, Wængongui tömengä nänö angaïnö iinque cæcæimpa, ante cædinque iincayæ quëwënäni pancadäniya cöwë guiiquenëni iñönänimpa.
⁷ Mänömaï beyæ, Æönædö eñenguënëmïni ìmïnii, ante odömoncæte ante cædinque Wængongui, “Ñöwoönæ,” ante awënë Dabii ingante wantæpiyæ ate apænecä eñengacäimpa. Înique mäninö botö do ante yewæmömo mïni adinö baï ante Dabii wodi ïïmaïnö ante yewæmongacäimpa.

“Ñöwoönæ incæ tömengä apænecä eñeninque mïnitö, Mïmï ömædëmöni bawënämaï incæmönimpa, ante cædinque Baa änämaï iedäni,” ante yewæmongacäimpa.

⁸ Edæ docä Ootowee wodi tömënäni iñänite doyedë mangucä guiidinque Cänaämæ quëwengadänimpa. Incæte tömënäni mäniömæ do guiidinäni inte näwangä guëmänäni baï Wængongui iincayæ ate, Ñöwoönæ guëmancämïnimpa, ante wæætë änämaï incædongäimpa. ⁹ Înique mönö Wængongui quïmï iñömö edæ guëmanguïönæ guëmante baï mönö tömengä nempo quëwëninque mïmönë guëmäninque cætawente wædämaï ingæimpa.
¹⁰ Wængongui iinque badöninque tömengä nänö

cæquënënö tömää cædinque ñimpo cædinque guëmangacäimpa. Tömengä nänö ñimpo cæte guëmangaï baï waocä iñömö Wængongui nempo guiidinque né guëmangä iñömö adobaï tömengä nänö cæquënënö ante, Tömänö do cætimpa, ante adinque ñimpo cædinque guëmangampa. **11** Dodäni näni eñenämaï cægaï baï ñöwodäni adobaï cædäni ïnique tömënäni näni tæ go wæænguinque cæbaïnänipa. Mänömaï i ïnique, Adocanque incæ mänömaï cæte tæ go wæænämaï incæcäimpa, ante wææ cædinque mönö tömämö, Wængongui nempo guuite mímönë guëmangæimpa, ante nanguï cæcæimpa.

12 Wængongui nänö änö iñömö mïïne quëwëne inte tæï piyænë ènepa. Edæ yaëmë yægamë tipængaa engamë bamencaa guibæ watii co baï Wængongui nänö änö iñömö adobaï cædinque mönö önöwoca incæ do cote baï guipa. Ayæ bamë tadömengadæmë tæï guïñænte bamii edonque a baï Wængongui nänö änö iñömö adobaï mönö mímö incæ tadömengadæ tæï guïñænte baï cædinque mönö pönënö ante mönö cæinënö ante do edonque ba adinque adode incæ apænte baï ampa. **13** Wængongui né apænte änongä iñongante mönö nämä incæ, Æbänö cægamönii, ante tömengä ingante töingä apænequënémö ïmompa. Edæ, Wængongui ayongä tömengä nänö badongaincoo tömancoo edæ gä ængate ömægacoo baï inte wodonämaï ongompa.

*Wængongui ingante né Godongä Ñœnængä Itota
ingampa*

¹⁴ Mönö beyæ, Wængongui qui, ante nē Godongä Ñænængä pönü iñömö Wængongui Wengä Itota ingampa. Tömengä iñömö nämä wepæ godonte do wængaingä inte ñäni ömæmöninque öönædë æite ongongampa. Ìnique mönö, Tömengä ingante wede pönemönipa, ante nē apænemö inte mönö wede pönönö ante ædæmö pæ mangæimpa.

¹⁵ Wængongui qui, ante mönö beyæ nē Godongä Ñænængä pönü iñongä iñömö wënæ wënæ cædämäi ingacäimpa. Incæte aquii imö inte wæmø adinque tömengä wæætë, Botö Waobo eñadinque aquii bate wægaimo inte, Aquii mïni wædö æbänö i, ante do edæ eñémopa, angampa. Edæ wënæ awënë tömengä ingante, Wënæ wënæ cæe, angä do wægaingä inte tömengä mönö wënæ wënæ cæinënö, Æbänö i, ante do eñengampa. ¹⁶ Ìnique mönö Awënë iñömö nangui waadete pönengä inte Awënë contaimpaa ongongampa cæmöö. Mönö wënæ wënæ cædinö ante tömengä pönü ñimpø cæcæcäimpa, ante cædinque mönö tömengä weca ponte apænecæimpa. Mönö caate wæyedë tömengä pönü töö æmænte cæcæcäimpa, ante mönö tömengä weca ponte apænecæimpa. Mänömaï Awënë ongompaa gäänë pöninque mönö guñenämäi inte apænemö eñeninque tömengä waadete pönü waa cæcä aengæimpa.

5

¹ Wængongui qui, ante bitö botö imote nē pönömi ñænæmi pönü bacæbiimpa, ante æcänö ingante Wængongui angä bacää.

Edæ waocä adocanque ingante apænte æninque Wængonguï angä ate tömengä iñömö në waocä iñongä inte waodäni beyæ Wængonguï weca cæcamp. Ìninque waodäni iñgä weca pöninque, Wængonguï qui, ante pædæ pönönäni æninque tömengä wæætë Wængonguï ingante godongampa. Ayæ, Wënæ wënæ cæmöni incæte Wængonguï waadete pönö ñimpo cæcæcäimpa, ante cædinque waodäni, Wængonguï qui, ante cæningä ænte pöninque pædæ pönönäni ængampa. Æninque në godongä ñænængä iñömö në waocä iñongä incæte cæningä ingante ænte wænöninque në ænte pönäni näni wënæ wënæ cædïnö beyæ ante baö iya tangampa. ² Ìninque wadäni, Æbämë impa, ante èñenämaï näni wædö ante në godongä ñænængä iñömö në waocä iñongä inte adobaï pancaa èñenämaï inte wæcamp. Ayæ oda cæte näni wædö ante tömengä adobaï oda cæte wæcamp. Ìninque wadäni baï aquiingä iñongä inte tömengä gänë pönéninque wadäni iñänite ædæmö cæte odömongä adänipa. ³ Mänömaï iñongä inte tömengä wadäni wënæ wënæ näni cædïnö beyæ ante, Wængonguï qui, ante iya täninque adobaï, Botö nämä wënæ wënæ cædïnö beyæ godömopa, ante iya tante Wængonguï ingante godongampa.

⁴ Waocä nämä incæ, Botö, Wængonguï qui, ante në godömo ñænæmo bayömote wadäni botö ïmote waa acædänimpa, ante ædö cæte anguingää. Ìñæmpa Wængonguï angä beyænque Aadöö wodi në godongä ñænængä bacä baï wadäni adobaï Wængonguï angä beyænque në godönäni ñænænäni badänipa. ⁵ Codito incæ, Në godömo

ñænæmo badinque në tæi ëmömo inte ñäö ëmömo
acædänimpa, ante nämä ante wii angacäimpa.
Wængonguü incæ tömengä ingante,

“Bitö botö Wëmi ïnömi ïmipa.

Nöwoönæ bitö Wæmpobo babopa.”

⁶ Angacäimpa. Ayæ godömenque Wængonguü nänö
angainö ante wataa yewæmongatimpa.

“Wængonguü quü, ante në pönongä Mëequitedeco
nänö cöwë ingaï baï,

bitö adobaï ñimpo cædämaï inte në Pönömi
cöwë incæbiimpa,” ante Codito ingante
angacäimpa.

⁷ Codito ïñömö Waocä ëñate quëwëningue Ca ca
wædinque Yæ yæ äninqe Wængonguü ingante
nanguü apænegacäimpa. Wængonguü bitö
adobique eyepæ ïmi inte wææ ämi ïnique botö
wænämaï ïmaîmopa, angacäimpa. Incæte, Bitö,
Wæe, ämi ate botö wæncæboimpa, ante nänö Ao
äninö beyænque Wængonguü tömengä ingante
do ëñengacäimpa. ⁸ Wæmpocä Wëñængä ïnongä
incæte Itota nänö caate wæwämämo beyænque
Wængonguü nänö änö ante ædämö ëñente cædinque
picængä bagacäimpa. ⁹ Tömengä nänö änö ante
në ëñente cædämö iñomonte tömengä ædämö
ëñenique picængä bagaingä inte edæ mönü
ïmonte ængä beyænque mönü cöwë wænämaï inte
quëwëmompa. ¹⁰ Tömengä ingante Wængonguü
apænte æninque, Mëequitedeco në pönongä
ñænængä poni nänö ingaï baï bitö adobaï botö
ïmote në Pönömi Ñænæmi poni ïnömi ïmipa,
angacäimpa.

Mönö wede pönënö ante Baa änämaï ingæimpa, ante

¹¹ Mäninö ante botö münitö ïmïnite godömenque nanguï apænequenëmo ïmopa. Incæte, Æliqedö ëñenguïminii, ante pönente wædinque botö, Æbänö cæte apænebo ëñenguïminii, ante wæbopa. ¹² ïñæmpa münitö doyedë mïni ëñengaïnö ante ñöwo në odömöminni baquenëmïni ïmïnipa. Incæte wacä wæætë münitö ïmïnite Wængonguï nänö angaïnö ante adodeque adodeque ante odömonte apænecä ëñenguënëmïni adodö bamïni awædö. Edæ wëñænäni në goömæ gänäni baï wæætë bamïni ïñomïnite botö ædö cæte tæëmö cænguï godonte baï apænebo ëñenguïminii. ¹³ Goömæ në gangä baï ingä iñomö tömengä wëñængä baï iñongante mönitö, Æbänö nö cæquiï, ante odömonte apænemöni incæte tömengä iñomö cöwë ëñenämaï ingampa. ¹⁴ Wæætë aecänö cöwë waa cæda ïna iñomö tömengä, Quïnö waa ii, ante, Quïnö wënæ wënæ ii, ante wæætë wæætë ante cædinque do ëñente badinque picængä baï bacampa. ïnique ædämö picænäni në badäni beyænque möni nö odömonte apænedö iñomö cænguï tæëmö baï ongampa.

6

¹ Mönö Codito inguiipoga quëwëninque æbänö cægacäi, ante do ëñemompa. Mönö wænguinö goquinque wënæ wënæ cæmompa, ante wædinque, Idæwaa wënæ wënæ cætabopa, ante mönö Wængonguï gämäno æbänö cæte ocæ ëmænte ponguiï, ante do ëñemompa. Tömengä ingante æbänö cæte pönenguïi, ante do ëñemompa. ïnique

mäninö tömänö ante do ëñënëmö inte mönö mäninö ante idæwaa tedetamompa. Wæætë, Æbänö cæte godömenque picämö baï ëñente baquïï, ante mönö ñöwo apænecæimpa. ² Adobaï, Æpænë quïnante guiiquïï, ante, Önompoca quïnante godö gampoquïï, ante do ëñëmö inte mönö mäninö ante godömenque tededämaï ingæimpa. Ayæ, Wænte ate ñäni mönö ömæmongæimpa, ante do ëñëmö ïnique, Wængonguï cöwë apænte ancæcäimpa, ante do ëñëmö ïnique mönö mäninö ante ñöwo godömenque tededämaï ingæimpa. ³ ïnique Wængonguï Ao angä ate botö mäninö mïnitö do ëñënïnö ante tededämaï incæboimpa. Mïnitö ëñënämaï ïnïnö ante wæætë nanguï apænebo ëñencæmïnimpa.

⁴ Wængonguï mönö mümönë pönö tica ënente baï cædinque edonque odömonte apænecä ëñënïnque mönö ñäö baï entawëmompa. Tömengä öönædë waa pöni nänö da pönongancoo do ænte quëwëmompa. Ayæ tömengä Tæiyæ Waëmö Önöwoca ingante da pönongä ænique mönö tömengä tönö äanque baï ëwocamompa. Mänömaï ëwocamö incæte pancadäniya wadæ godäni inte edæ ædö cæte, Wënæ wënæ cæte awædö, ante ocæ ëmænte ponguïnäni. ⁵ Tömänäni ïñömö, Wængonguï nänö äö waa pöni impa, ante do ëñënïnäni inte ayæ, Wængonguï müinguipo nänö badöñedë mäniñedë müimämoque ba ate tæï pïñænte cæcæimpa, ante do ëñënänipa. ⁶ Incæte mäninö näni wede pönënïnö ante Baa ante wadæ godäni baï tömänäni edæ ædö cæte iincayæ ate, Idæwaa wënæ wënæ cæte awædö, ante ocæ

ëmænte ponguïnänii. Ìñæmpa dodäni Wængonguï Wengä ingante awæ tempote wænönäni baï cædinque iïnäni wæætë tömengä ingante adodö wænonte baï cædänipa. Ayæ tömënäni näni æmæwo ëwente wæquinque tömänäni ayönäni Wængonguï Wengä ingante badete tote baï cædänipa.

⁷ Edæ cöönæ wantæ wantæ cæ ate waodäni cöñe inguipoga tömämö quiyadäni wææ pæte incapa. Incate amämö ba ate né quiyadänäni nanguï tä pete eyepæ ñänäni iïnique Wængonguï wæætë onguipo tömenguipo waa pæ ate adinque, Waa pæguipo abopa, angampa. Adobaï tömengä näñö änö ante wantæ wantæ iñö apænedäni ëñeninqe waodäni gänë pönënäni badinque wadäni iñänite waadete cædäni ate Wængonguï mänänäni iñänite, Minitö waa ëñente cæmïni abopa, ante pönö waa cæcamp. ⁸ Ömentacooque pæguipo daacamenque pæguipo guiquenë näñö æmæwo tante ëwenguinqe önonguipoque impa. Mäninguipo iya tangui baï waocä adobaï Wængonguï näñö änö ante né Baa angä iñömö tömengä näñö æmæwo ëwenguinqe Baa angampa.

Watapæ bacæimpa, ante pönëninqe tæi ongömompa

⁹ Ìñänäni ëñeedäni. Wadäni mänömaï iñänipa, ante yewæmömöni incæte mönitö ayömöni münitö wii tömënäni baï ïmïni amönipa. Wæætë Codito ængä beyænque né quëwenguïmïni iñomïni inte münitö cöwë waa cæmïni ïmïni amönipa. ¹⁰ Edæ münitö cöwë waa cædinque Wængonguï ingante waadete pönëninqe tömengä quïnäni beyæ godö

waa cægaïmïni inte ñöwo godömenque cæminipa, ante adingä inte Wængonguï dicæ mïni cædö ante pönénämäi inguingää. Wæætë në nö cædongä inte tömengä mïni cædö ante cöwë pönengampa.

11 Codito beyænque watapæ bacæimpa, ante mïnitö wede pönémïnipa. ïnique mïnitö mäninö mini wede pönënö ante ïnique baganca wede pönencæte ante cædinque mïni waadete pönö cægainö baï adobaï ïnique baganca cöwë cædäni, ämönipa.

12 Edæ në wede pönénäni wæntæye ïnämaï ïnäni ïñömö edæ Wængonguï, Pönömo æedäni, ante näno angaincoo cöwë æncædänimpa. Minitö ïñömö, Töménäni æbänö cædäni, ante adinque töménäni näni cædö baï adobaï cædinque wæntæye ïnämaï inte Wængonguï näno angaincoo adobaï æncæmïnimpa, ämönipa.

13 Wængonguï, Botö änö baï cöwë cæcæboimpa, ante Abadäö wodi ingante angacäimpa. Mänömaïnö ante näwangä impa, ante Abadäö ëñencæcäimpa, ante cædinque tömengä, Wacä ëmöwo godömenque tæi piñængä ëmöwo ante apænebo ëñeninqe do ëñencæcäimpa, ante cæyongante wacä në tæi piñængä guiquënen edæ dæ angacäimpa. ïnique Wængonguï ïñömö nämä ëmöwo ante apænedinqe, Wængonguïmo në Quëwëmo inte nöingä ante ämo ëñee, änínque ïimaï angacäimpa.

14 “Botö bitö ïmite pönö waa cæbo ate bitö pæinäni nanguï yebæninque bacoo bacædänimpa. Botö Wængonguïmo në Quëwëmo inte ämopa.”

15 Ante do angä ëñengaingä inte Abadäö wodi wantæpiyæ ænämaï inte wänö cöñongante Wængonguï tömengä näno angainö

baï pönö cæcä ængacäimpa.

16 Waodäni guiquenë, Näwangä ämopa, ante ëñencädänimpa, ante cædinque wacä ëmöwo godömenque tæi piñængä ëmöwo apænedinque änänipa. Mänömaï cædinque waocä, Botö godömenque në tæi piñængä tönö guëa cæte baï änimo inte ædö cæte babæ ante wadö cæquümo, ante baï apæneyongante wacä Ao angä ate tömëna näna guëa cæcaya badapa.

17 Wængonguü ïñömö, Botö wadö baï änämäï ïnömo inte mänii botö angainö baï cöwë cæcæboimpa, angacäimpa. Ayæ, Mänömaï impa, ante botö angaincoo në ænguinäni ædæmë ëñencädänimpa, ante cædinque Wængonguü nämä ëmöwo apænedinque, Botö Wængonguümo në Quëwënömo inte näwangä ämopa, angacäimpa.

18 Tömengä, Botö pönö cæbo beyænque watapæ bacæimpa, ante nänö angainö ante æncæte ante mönö Wængonguü gämænö do wodii wïnonte pömöimpa. Îninque tömengä weca do pönimö ïñömonte tömengä wæætë, Mënea beyæ mönö watapæ bacæimpa, angampa. Ayæ, Minitö wampo pönëninque edæ botö tönö edæ godömenque cæcæminimpa, ante tömengä ædæmë apænecampa. Mënea ante apænebo ëñeedäni. Botö Wængonguümo ïnömo inte nämä Wængonguü ëmöwo apænebo beyæ në ëñemini inte mïnitö mänïne beyæ pönencæminimpa. Ayæ godömenque wade ante, Wængonguü incæ ædö cæte babæ wapiticæ anguingää, ante pönencæminimpa. Mänömaï Wængonguü mënea ante cægacäimpa.

19 Îninque wipo gæguincamë inte tæi

ñänoncadodäni ate wäi wocæ baï mönö iñömö edæ, Mänïne mënea beyæ watapæ bacæimpa, ante mönö wede pönönö beyæ tæi ongömö inte mönö ædö cæte wadæ goquïi. Mönö wede pönönö beyænque edæ Wængongui oncönë weocoo wææ owoyömo tadömengadæncönë guii öönædë ñä cæte baï iñinque mönö önöwoca iñömö edæ tæi ongonte baï ëwocamompa. ²⁰ Itota iñömö täno beyænte öönædë æidinque mönö beyæ ante mänincönë do wäänë guigacäimpa. Iñinque Mëequitedeco në godongä ñænængä nänö ingaï baï badinque Itota, Wængongui qui, ante nämä wepæ në Godongä Ñænængä poni iñongä inte edæ cówë ongongampa.

7

Mëequitedeco baï Itota në Godongä Ñænængä ingampa

¹ Mëequitedeco guiquenë Tadëë näni äñömö qulewänäni awënë odehye iñongä inte tömengä, Wængongui Æibæ poni në Quewengä qui, ante në godongä ingacäimpa. Iñongante Abadäö wodi wadäni awënë odehyeidi iñänite wænonte pöñongante Mëequitedeco eyepæ pö bee ténique, Abadäö ëñëmi, angantapa. Bitö imite Wængongui pönö waa cæcæcäimpa. ² Ante pönö waa apæneyongante Abadäö iñömö awënëidi wodi näni mangaincoo tömengä nänö ö ænincoo bacoo poni incoo adinque önompo tipæmpoga mänimpocato cabotü gæte cö cædinque, Wængongui qui, änique Mëequitedeco ingante adocatoque pædæ godongä ængacäimpa.

Mëequitedeco në awënë odehye iñongante tömengä ëmöwo pemonte baï cædinque wadäni, “Awënë iñongä inte tömengä në nö cæcä ingampa,” ante angadänimpa. Ayæ, Tadëe “Gänë pönëñömö” näni angañömö quewenäni awënë odehye ingampa, ante pönéninque töménäni, “Awënë odehye iñongä inte tömengä në gänë pönengä ingampa,” ante wawo pemongadänimpa. ³ Tömengä badä ömaacä ingä baï, tömengä wæmpocä ömaacä ingä baï, tömengä nänö ñagaïonæ ömaacä ingä baï, tömengä nänö wængaïonæ ömaacä ingä baï ante dodäni tömengä ingantedö ante yewæmongadänimpa. Mänömaï i iñinque mönö, Wængonguï Wengä nänö cöwë ingaï baï Mëequitedeco adobaï, Wængonguï qui, ante në cöwë godongä ingampa, ante pönengæimpä.

⁴ Tömengä ñænængä poni ingacäimpa, ante botö iimaï ante apænebo pönëedäni. Wængonguï qui, ante në godongä ñænængä poni Mëequitedeco ingampa, ante pönéninque mönö wæmæ Abadäö wodi incæ tömengä nänö ö ænincoo önompo tipæmpoga mänimpocato ongö adinque adocatoque æninque Mëequitedeco ñænængä ingante pædæ godongä ængacäimpa. ⁵ Mönö Abadäö wodi pæimö iñömö tömancabomö iñömö incæte adocabodäniya mönö töniñadäni Debiidi pancadäniya guiquenë, Wængonguï qui, ante në godönäni bagadänimpa. Bayönäni Möitee wodi töménäni iñänite iimaï angacäimpa. Minitö töniñadäni iñänite ämini ñenéinque töménäni wæætë töménäni näni ænincoo önompo tipæmpoga mänimpocato ongö adinque adocatoque pædæ pönönäni æncæminimpa, ante wææ angä ñenéinque töménäni, Wængonguï qui bacæimpä, ante

në ænäni ïnänipa. **6** Mëequitedeco guiquënë Debii wodi pæingä ïnämäi ingaingä incæte adocatoque angä ëñeninqüe Abadääö wodi pædæ godongä ængacäimpa. Do ïñömö Wængonguï incæ Abadääö ingante apænedinqüe, Bitö qui, ante botö cöwë pönömo æncæbiimpa, angacäimpa. Incæte wantæpiyæ ate Wængonguï näö në angaingä ïñongante Abadääö ingante apænedinqüe Mëequitedeco ïñömö, Wængonguï bitö imite pönö waa cæcæcäimpa, ante pönö waa apænegacäimpa.

7 Mönö ayömö guiquënë, Ñænænäni ïnönäni ïñömö tömänäniqüe önonänique ïnänite në godö waa apænedäni ïnänipa, ante do ëñenïmo inte mönö wadö ante ædö cæte pönenguï. ïnique, Abadääö wodi önonganque ïñongante Mëequitedeco në ñænængä ïnongä inte edæ mänömaï waa apænegacäimpa, ante mönö edonque ëñemompa. **8** Mäninäni Debiidi guiquënë në ñömæintai ëñadäni ïnänipa. Incæte tömänäni ïnänite wadäni, Wængonguï qui bacæimpa, ante adocatoque cöwë pönönäni ænänipa. ïngä Mëequitedeco guiquënë ñömæintai ëñadämaï baï ingaingä inte në quëwengä ingampa, ante yewæmongatimpa. Tömengä mänömaï në quëwengä baï ïñongante Abadääö wodi tömengä ingante, Wængonguï qui, ante adocatoque godongä ængacäimpa.

9 Mänömaï impa, ante pönëninqüe botö, Ëñencæmïnimpa, ante ñöwo godömenqüe yewæmömo aedäni. Tömänäni näni ænïnö önompo tipæmpoga ganca mänimpocato ongö adinqüe, Wængonguï qui, ante adocatoque pædæ godöñönäni Debii näni pæincabo incæ në

ænäni ïnönänimpa. Incæte Debii wodi wæmpocoo ingainga ïnongä inte Abadäö wodi adocatoque do godongä ïninque tömengä pæingä inguingä Debii iñömö wæmpocoo tönö äanque baï adocatoque do godonte baï ayæ ate ëñate quëwengacäimpa. ¹⁰ Edæ Abadäö wodi näö pæinäni Debiidi ïnänipa. ïninque Debii ayæ ëñadämaï iñongante tömengä wæmpocoo Abadäö wodi ingante Mëequitedeco pö bee tente adocatoque æninque Debii näö ænguënencoo incæ pancacooga adobaï ængacäimpa.

¹¹ Wængongui doyedë angä ëñeninque Debiidi pancadäniya, Wængongui qui, ante në godönäni bagadänimpa. Ayæ Wængongui, ïimaï cæedäni, ante angä ëñente yewæmöninque Debiidi wæætë wadäni ïnänite odömonte apænedäni ëñengadänimpa. Incæte Debiidi, Wængongui qui, ante näni godönö beyænque mönö Wængongui ayongä mönö ædæmö pædäni baï edæ dicæ entawente bamongaa. ïñæmpa mänänäni näni godönö beyænque në picænäni baï bamö baï ñöwo wacä në Godongä ingante Wængongui da pönönämäi incædongäimpa. Ayæ, Wængongui qui, ante në Pönongä incæcäimpa, ante Codito ingante da pönöninque Wængongui, Debii wodi pæingä Aadöö näö pönongaï baï Codito adobaï pönoncæcäimpa, ante änämäi inte wæætë, Mëequitedeco näö pönongaï baï cædinque Codito pönongä beyænque waodäni botö ayömö në nö cædäni bacædänimpa, angacäimpa. ¹² Ayæ, Wængongui qui, ante näni godoncabo iñönänite Wængongui, Idæwaa cæmünipa, änique wacä ingante, Bitö wæætë botö imote në Pönömi

bacæbiimpa, angacäimpa. Ayæ wacä mänömaï në Godongä bacä beyæ Wængonguü, ïimaï cæedäni, ante nänö wææ angaïnö ante wëä godonte baï cædinque wade änique wææ angä ingacäimpa.

¹³ ïninque Wængonguü ñöwo, Në Pönömi bacæbiimpa, ante nänö në angaingä iñömö Debiidi näni cabø ïnämäi inte wæætë wacabocä ïnongä ingampa. Incæte ñöwocä Codito guiidënäni iñömö, Wængonguü quï, ante näni iya täimpaa cöwë godönämäi ïnönänimpa. ¹⁴ Edæ, Wængonguü quï, ante oodaaidi näni cabø në godönäni incædänimpa, ante Möitee wodi dicæ angacäiñaa. Incæte, Mönö Awënë iñömö Oodaa wodi pæingä ingacäimpa, ante edonque acæimpa. ¹⁵ ïninque Mëequitedeco nänö ingai baï wacä wæætë, Wængonguü quï, ante në Godongä bacä adimö inte mönü godömenque edonque eñengæimpa. ¹⁶ Edæ Ñöwocä tömengä mæmæidi wii në godönäni ingadänimpa. ïninque, Bitö mæmæidi näni godongaï baï bitö adobaï godonte eñee, ante ædö cæte anguiï. Wii tömengä mæmæidi näni cægaï baï cædinque tömengä në Godongä bagacäimpa. Wæætë cöwë në wænämäi Quëwenguingä inte tömengä nämä nänö tæi piñænö beyænque në Godongä bagacäimpa. ¹⁷ Edæ tömengä ingante apænedinque Wængonguü, “Mëequitedeco, Wængonguü quï, ante në pönongä cöwë nänö ingai baï, bitö adobaï ñimpo cædämäi inte në Pönömi cöwë incæbiimpa,” ante apænegacäimpa.

¹⁸ ïninque, ïimaï cæedäni, ante Möitee wodi wëenëñedë nänö wææ angaïne incæ aquïïne inte önöneque baï ïñonte wëä godonte baï bagatimpa.

19 Edæ Möitee wodi, ïimaï cæedäni, ante nänö wææ angaïnö eñente beyænque mönö Wængonguï ayongä ædæmö paedäni baï dicæ entawente baquïmoo. Wængonguï wæætë, Codito pönö cæcä beyænque watapæ quëwencæmïniipa, ante ñöwo pönö apænegacäimpa. ïnique, Mänömaï impa, ante pönënique mönö Wængonguï weca pömompa.

20 Wængonguï wii önonque angacäimpa. Wæætë tömengä nämä ëmöwo apænedinque, Botö Wængonguïmo në Quëwënömo inte näwangä ämopa, änique Codito ingante angä ate tömengä wæætë, Wængonguï qui, ante në Godongä bagacäimpa. Wæætë wadäni ïnänite guiquenë tömengä wii nämä ëmöwo apænedinque, Näwangä ämopa, ante änämaï ingä incæte tömänäni önonque, Wængonguï qui, ante në godönäni bagadänimpa. **21** Codito ingante guiquenë Wængonguï ïmaï ante apænegacäimpa.

“Bitö ñimpo cædämaï inte, Wængonguï qui, ante në Pönömi cöwë incæbiimpa.

Ante botö në Tæiyæ Awënë ïnömo inte nöingä änique

ïincayæ ate wadö ante cöwë änämaï incæboimpa.”

22 Wængonguï, Itota botö ïmote në Pönongä ïnongä inte mïnitö beyæ cæcä ate mïnitö Ao ämïni ïnique mönö godongämæ waa cæcæimpa, änique Wængonguï mönö ïmonte ñöwo godömenque waa poni apænegacäimpa. ïnique Wængonguï mänömaï nämä ëmöwo apænedinque, Näwangä ämopa, änique Itota nänö në angäingä iñongante mönö Itota ingante pönënique, Wængonguï nänö angaïnö baï cöwë cæcæcäimpa, ante do eñemompa.

23 Mäninäni guiquenë në ñömæintai eñagaïnäni

inte ædö cæte ñimpo cædämaï inte Wængongui ingante nē godönäni cöwë inguünänii. Ìnique wii adocanque nē godongä ingacäimpa. Wacä wacä nē godönäni bagadänimp. ²⁴ Itota iñömö nē wænämaï quëwënongä inte tömengä, Wængongui qui, ante nē Godongä ìnongä inte cöwë quëwengampa. ²⁵ Edæ tömengä nē wænämaï Quëwënongä inte Wængongui ingante mönö beyæ ante cöwë apænedinque, Botö bitö gämænö nē mämömo pönäni ìnänite bitö pönö waa cæcæbiimpa, ante ñimpo cædämaï inte cöwë apænecampa. Wængongui ingante cöwë apænecä ìnongä inte tömengä cöwë quëwëninquæ ædæmö pönö ængä beyænque mönö wæætë cöwë wænämaï quëwenguimö imompa.

²⁶ Wadäni näni eñenämaï cæcabo baï wii ìnongä inte Itota iñömö tæiyæ waëmö ìnongä ingampa. Wentamö mongænämaï ìnongä iñongante tömengä ingante ædö cæte piñte apænte anguünänii. Mänömaï ingä adinque Wængongui tömengä ingante öönædë ñemonga poni ængö cæcä ongongampa. Ìnique tömengä adocanque poni, Wængongui qui, ante nē nö Godongä Ñænængä poni ìnongä inte mönö wædö ante eyepæ poni pönö cæcamp. ²⁷ Wadäni nē godönäni ñænænäni poni ìnäni guiquenë tömänäni täno godöninquæ nämä näni wënæ wënæ cædö beyæ ante, Wængongui botö imote waa acæcæimpa, ante cæningä wepæ ïimö iñö ïimö iñö godönänipa. Ayæ ate wadäni näni wënæ wënæ cædö beyæ adobaï godönänipa. Itota guiquenë wënæ wënæ näni cædö baï cædämaï ìnongä inte nämä beyænque godönämaï ingacäimpa. Ayæ wamö mönö wënæ wënæ cædö beyæ wæætë

wæætë godönämaï inte tömengä eyepæ ïnongä inte adopoque pöni godongacäimpa. ïnique tömengä nämä wepæ godöninque eyepæ pöni godongä adinque Wængonguü wæætë mönö ïmonte waa acampa.

28 Möttee wodi nänö wææ angaïnö ante ëñente cædinque waodäni aquüi ïnäni näni cabo iñönänite pancadäniya ïnänite änäni Wængonguü ingante né godönäni ñænænäni do badänipa. Wængonguü guiquenë iiincayæ ate nämä ëmöwo apænedinque, Botö Wengä ædämö Picængä né ëñengä bagaingä ingante ämo ate tömengä né Pönongä Ñænængä bacæcäimpa. Botö Wængonguümo né Quëwënömo inte näwangä ämopa, angacäimpa.

8

Wængonguü ñöwo nänö angaïnö ante Itota ïnque cæcü

¹ Mänömaïnö ante quïnante yewæmömönii. Edæ, Mönö wædö beyæ ante, Wængonguü quü, ante né Godongä Ñænængä pöni inte ongongampa, ante, Näwangä impa, ante edonque ëñencæmïnimpä, ante yewæmömönipa. Tömengä iñömö öönædë æidinque Awënë Wængonguü tömémængä ïnö tæ contadinque Tæiyæ Awënë inte ongongampa, ante yewæmömöni adinque ëñencæmïnimpä. ²Mänömaï ïnongä inte tömengä wii waocä nänö mænonganincönë cæcampä. Wæætë Wængonguü, Owocæboimpa, ante tæiyæ waëmö nänö mænonganincönë Itota iñömö mönö beyæ ante, Wængonguü quü, ante né Godongä Ñænængä pöni inte cæcampä.

³ Inguipoga quëwënäni guiquënë adocanque ingante, Wængonguï qui, ante bitö në godömi ñænæmi pönü bacæbiimpa, änäni badinque tömengä në tä në tä cædinque mäinc oo cöwë godonguënengä ingampa. Ìnique mäningä Itota guiquënë adobaï në Godongä Ñænængä pönü ïnongä inte adobaï godonguënengä ingampa.

⁴ Edæ, Ìncooque godoncæmïnimpa, ante Möitee wodi wææ angä ëñente cædinque inguipoga në godönäni guiquënë do eyepæ pönü godönäni ïnänipa. Ìnique tömënäni näni godö baï Itota iñömö ædö cæte godonguënengä inguingää. Inguipogaque quëwengä inte baï tömengä iñömö edæ Wængonguï ingante në godongä ïnämäi incædongäimpa.

⁵ Tömënäni guiquënë, Wængonguï öönædë nänö owocö cöwë ongö baï inguipoga adobaï mænonte mänincö òwocodenganque baï iñonté acæimpa, ante adobaï pönü mænongadänimpa. Mänömaï mænöninque tömënäni mänincönenque, Wængonguï qui, ante në godönäni inte cædänipa. Ìnique Wængonguï, Adobaï pönü mænöincö ongongæimpa, ante cædinque Möitee wodi në mænonguingä ingante doyedë angacäimpa. “Möitee ëñëmi. Bitö, Æbänö mænonguïi, ante, Æbänö badonguïi, ante botö onquiyabo iñömö bee tente odömömo adinque badoncæbiimpa. Bitö cöwä adinque botö odömönö baï iincö adobaï mænöninque iincöne ongoncoo tömancoo adobaï pönü badoncæbiimpa,” angacäimpa. ⁶ Wængonguï, Botö Möitee tönö wææ änique, Ìmaï cæedäni, ämo ate Ao ämïni ìnique mönö godongämæ waa cæte

quëwengæimpa, ante wëenëñedë nänö angaïnö wædænque waa ingatimpa. Ñöwo guiquenë tömengä, Itota ængä beyænque quëwemini inte Ao ämini ïnique mënito botö tönö godongämæ waa cæte quëwencæmïnimpa, ante nänö änö ïñömö godömenque waa pöni impa. Edæ Wængongui nänö änö ïnique bacæimpa, ante Itota incæ nö cægacäimpa. Ayæ adobaï mäninö né godönäni näni cædö guiquenë wædænque waa ïñonte Itota nänö nö cædö guiquenë godömenque waa pöni impa.

⁷ Mänine edæ, Mönö godongämæ waa cæte quëwengæimpa, ante Wængongui wëenëñedë nänö angaine ïñömö mönö quëwenguïnö ante eyepæ i baï Wængongui ñöwo wade ante änämaï incædongäimpa. ⁸ Incæte waodäni wentamö mongænäni adinque Wængongui doyedë apænedinque,

“Botö pöno cæbo ate mënito Ao ämini ïnique mönö godongämæ waa cæte quëwengæimpa,
Ante botö né Awënë ïñomo inte idægoidi ïnänite oodaaidi ïnänite iincayæ ate mïne ante mä pöni apænecæboimpa.

⁹ Mæmæidi doyedë Equitobæ quëwëñönänite botö töö æmænte ænte poncæte ante cædinque, tömänäni ïnänite, Mönö godongämæ waa cæcæimpa, änömote tömänäni wæætë pango cæte gogadänimpa.

Pango cæte godäni ate botö wæætë dadi ëmæmonte tömänäni ïnänite adämaï ingaboimpa.

Mänömaï beyæ botö wëenëñedë botö angaïnö baï ñöwo wæætë adobaïnö ante änämaï incæboimpa, ante botö né Awënëmo ïñomo inte ämopa.

- 10** Mäniñedë ate edæ idægoidi ïnänite botö,
 ïimaï pönö cæbo ate münitö Ao ämïni ïnique
 mönö godongämæ waa cæte quëwengæimpa,
 änique edæ ïmaï cæcæboimpa.
 ïmaï cæedäni, ante botö wææ änö ante godö
 apænebo ëñenique
 mänïne ante mïmönë yewæmonte baï
 entawëníque
 tömënäni në wede pönënäni incædänimpa.
 Tömëmo tömënäni Wængonguïmo ïñömote tömënäni
 wæætë botö quïnäni incædänimpa.
- 11** Mäniñedë botö angaïñedë ba ate edæ waocä
 tömengä guiidengä ingante
 ayæ wacä ingante odömonte apænedinque,
 Bitö Wængonguï ingante ate baï pönencæbiimpa,
 ante quïnante anguingää.
 ïñæmpa mäniñedë ate guiyanga poni ïnongä incæ
 ñænængä poni ïnongä incæ
 tömënäni tömänäni botö ïmote do adinque
 pönencædänimpa.
- 12** Edæ tömënäni eñenämaï näni cædö ante
 botö pänämaï inte waadete godö ñimpö
 cæcæboimpa.
 Ayæ tömënäni wënæ wënæ näni cægaïnö
 ante adämaï inte baï botö pönënämaï
 incæboimpa,” ante Wængonguï
 apænegacäimpa.
- 13** Änique ñöwo, Æmo beyænque quëwëmïni
 inte münitö Ao ämïni ïnique mönö godongämæ
 waa cæte quëwengæimpa, ante mä poni änique
 Wængonguï wëenëñedë, ïmaï cæedäni, ante nänö
 wææ angaïne ante, Woïne inte eyepæ ïnämaï

ingaïne ënepa, ante baï cæcamp. Woïne iñömö oo dæ baquïne ënepa.

9

Wængonguï Tæiyæ Waëmö oncö baï æmontaicö impa

¹ Wængonguï wëenëñedë dodäni iñänite, Botö pönö cæbo ate mïnitö Ao ämini iñinque mönö godongämæ waa cæte quëwengæimpa, angacäimpa. Iñinque tömengä nänö wææ angaïnö baï cædinque tömënäni, Wængonguï ingampa, ante tömengä beyæ cæquënënäni ingadänimpa. Ayæ inguipoga tömengä owoquincö tæiyæ waëmö oncö mænnöninque tömengä weca pöninque cæquënënäni ingadänimpa. ² Angä eñeninque dodäni, Wængonguï nänö owoquincö, ante æmontaicö badöninque weocoo odemontai wodönedinque mencönea badongadänimpa. Yabæcönë, Tæiyæ Waëmö Oncö impa, ante näni ancönë iñömö mäniñömö gongapæncade doyæncade tæiyæ ti wodönoquï encadocade ongongatimpa. Ayæ awæmpaa badöninque tömënäni, Wængonguï beyæ tæiyæ waëmö päö öñongæimpa, ante cædinque mänimpaa päö ñö cædäni öñongatimpa.

³ Weocoo wacoo näni guimongademö wodöiñömö guimongacö iñömö Tæiyæ Waëmoncö Poni näni angaincö ingatimpa. ⁴ Mänincönë ogui wacæimpa, ante cædinque, Ogui waqui iya tangæimpa, ante awæmpa oodo näni pönö tee bæimpa badonte cö cædäni ongongatimpa. Ayæ, Mönö godongämæ waa cæcæimpa, ante wææ änинque Wængonguï nänö yewæmonganica

Tæiyæ Waëmoncönë Pöni ongongæimpa, ante cædinque awæmpa badöningue oodo yabæpa tee baadinque cæncadempa adobaï tee baate näni cönöimpa ongongatimpa. Ayæ oodo æninque aca podonte wamoncade baï bædinque tömënäni önomæca näni cængaimö Mänää näni angaimö æninque oodo näni bædincadedë da wéninque mänincade wæætë oodo émompa cæncadë ïnö da wente cö cæte mangadänimpa. Ayæ adobaï Aadöö wodi näñö ongonto tä bocagainto æninque ado oodo émompa cæncadë ïnö da wente ñö cædäni öñongatimpa. Ayæ Wængongui dicaboga näñö, Íimaï cædäni, ante yewæmongaïne adoyömö ongongæimpa, ante cædinque mäninca æninque ado oodo émompa cæncadë ïnö da wéninque cö cædäni ongongatimpa.

⁵ Mänimpaa yædopaa waomini mïni wénæ wénæ cædö beyæ wepæ godonte impa, ante Wængongui, Botö pönö waadeimpa impapa, angacäimpa. Ayæ Wængongui né ñäö émongä weca né owoda iñömö adobaï ñäö baï émöna iñonate tömëna näna émönö baï dodäni adobaï badonte oodo émompa æmatæ æmatæ tæi goncædäni ongongatimpa. Ayæ tömëna öömä tiyämää pömæna gänë iñömö Wængongui, Botö pönö waadeimpa, ante näñö angaimpa öñongatimpa. Mänimpacoo æbänö impaa, ante mäninque ñöwo yewæmömönipa.

⁶ Tömancoo mänömaï cöö cædäni ongöñonte, Wængongui quï, ante né godönänique iñmö iñö iñmö iñö yabæcönë pö guiidinque, Wængongui ingampa, ante cægadänimpa. ⁷ Guiimongacönë guiquené né godongä ñænængä iñömö wadepo iñö adopoque wadepo iñö adopoque pö

guiidinque tömengä adocanque guiidongäimpa. Incæte tömengä nē godongä ñænængä pöni ïnongä incæ wepæ nænæmaï inte ædö cæte guiiquingä. Edæ wepæ cöwë ænte guiidinque tömengä nämä beyæ godö pipo pipo cædinque, Wadâni èñenämaï inte näni wénæ wénæ cægäinö incæ ñä mënongacæimpa, ante tömänäni beyæ adobai godö pipo pipo cædongäimpa. ⁸ Mänincö ðmontaicö ayæ ongöñedë Tæiyæ Waëmoncönë Pöni wii önonque guigadänimpa. Wængonguü nänö owodö æidö mäniñedë adobai wii edonque ingatimpa, ante odömoncæte ante Wængonguü Tæiyæ Waëmö Önöwoca angä guiidämaï ingadänimpa.

⁹ Mänömaïnö ante odömöninque tömengä mönü ñöwomö ïmonte wæætë, ïmaï ante èñencæmënimpa, ante cægacæimpa. Waocä, Wentamö mongænte awædö, ante nē wædongä inte waëmö ïñömö pöningue, Wængonguü qui, ante baö iya tangui töönö bequü cænguü godongampa. Mänömaï ancaa godongä incæte tömengä mümö nämä nänö apænte entawénö ñä mënongadämaï inte wentamö ayæ mongænte entawénongäimpa. ¹⁰ Mänömaï cænguinque bequinque ante wææ äninquue, Æbänö cæte godonguü, ante ayæ, Æpænenque æbänö cæte mënongaquiü, ante dodäni mänincooque ante näni wææ angaïnö ante èñente cægadänimpa. ïnique, Wagupo ïnique bayonte önöwoca ædæmö mënongate quëwengæimpa, ante münguipo ïnique bagancaque tömänäni mänincooque ante cædönänimpa.

¹¹ Wapämo mïni waa quëwenguinque pömämo, ante badoncæte ante mönü Codito

iñömö, Wængonguï quï, ante në Godongä Ñænængä pönï ïnongä inte do pongacäimpa. Pöninque tömengä waodäni önompoca nåni mænonganincöne guiidämaï inte Wængonguï nänö badongainguipoga cædämaï ingacäimpa. Wæætë adodö go æidinque tömengä öönædë Wængonguï nänö owocöne ñænæncöne guiidinque näwä owocöne cægacäimpa. ¹² Caboda wepæ næænte guiidämaï inte wagada wë wepæ næænte guiidämaï inte mönö Codito iñömö edæ nämä wepæ godöninque öönædë Tæiyæ Waëmoncöne Poni æmæwo guigacäimpa. ïnique tömengä ængä beyænque mönö æmæwo poni abæ tawænte baï cöwë quëwëmomopa.

¹³ Nömæï incæ gampodinque, do wæningä baö incæ gampodinque waocä näate baï wædongä inte edæ Wængonguï weca ædö cæte ponguingää. Wæætë, Tömengä waiñacä bate poncæcäimpa, ante cædinque, Wængonguï quï, ante në godönäni iñömö caboda wepæ tönö wagada onguïñængä wepæ æninque në näadingä baonga pipo pipo cædänipa. Ayæ wagada baquecä ingante wænonte në täninque gönüique adobaï æninque tömengä baonga pipo pipo cædinque, Bitö në näadimi inte waiñabi babipa, ante cægadänimpa.

¹⁴ Mönö Codito guiquenë Tæiyæ Waëmö ïnongä inte në cöwë Quëwengä Önöwoca tönö guëa cædinque Wængonguï ingante, Bitö quïmo ïmopa, ante nämä wepæ godongacäimpa. Tömengä wepæ iñömö wii cæningä wepæ baï inte godömenque eyepæ poni wepæ ïmæmpa. ïnique mönö wænguinque wënæ wënæ cæyömonte

tömengä, Minitö mümö entawëmïni inte ñä mënongate entawente nämä apænte pönente quëwencämïnimpa, ante nämä wepæ do godongacäimpa. Ayæ mönö wënæ wënæ cægaïnö ante wadæ cædinque godömenque pönö cæcä ate mönö Wængonguï në Quëwengä ingante në cämö badinque cämompa.

15 Wængonguï müïne ante apænedinque, Mönö godongämæ waa cæte quëwengæimpa, äñongante mönö waocabo wæætë ëñenämaï inte wënæ wënæ cämö adinque Codito iñömö mönö wënæ wënæ cægaïnö beyæ ante wæætë wængä beyænque mönö abæ tawænte baï quëwëmompa. Ñöwo iñömö Wængonguï müïne ante apænedinque, Botö pönö cæbo ate mimitö Ao ämïni iñinque mini ænguincoo æmæwo æninque mimitö cöwë mante quëwencämïnimpa, ante aa pecä pongamönimpa. Iñinque mönö Codito wæætë, Wængonguï nänö angaincoo æncämïnimpa, ante cædinque iñinque cæcä ate mönö në pönimö inte do ænte quëwëmompa.

16 Waocä, Näñe wæmo adinque botö mäinc oo iñi iñänique æncädänimpa, ante èmöwo èmöwo yewæmongä adinque wadäni wæætë, Næwangä æmæwo wængäimpa, ante èñente ate, Në wængaingä nänö ante yewæmongaïnö baï bacæimpa, ante iñinque cædänipa. **17** Iñæmpa, iñäni qui bacæimpa, ante yewæmongä incæte në yewæmönigä müingä quëwëñongante tömengä mäinc oo ædö cæte tömënäni qui baquïi. Wæætë tömengä æmæwo wængä ate mäniñedë ate tömengä nänö yewæmongaï baï iñinque cædänipa.

18 Mänömaï beyæ wëenëñedë Wængongui, Mönö godongämæ waa cæcæimpa, ante yewæmongä ate dodäni cæningä wænonte ate wepæ gowete ate godongämæ Ao änique ïnque cægadänimpa.

19 Wængongui, ïimaï cædäni, nänö wææ angaïnö tömanta adinque Möitee wodi iñömö tömänäni ïnänite apænecä eñenäni ate wepæ gowete ate cægacäimpa. Wagada wënäni wepæ tönö caboda wepæ ænique æpæ tönö ænte wempo cædëninque iitopowæ näni äwæ yæpængö ænique obega ocaguï opatawæmæ näni guipæningui ænte pæ dacadinque wepæ näni wempo cædënimænë bee podonte Möitee iñömö, Mäninta adinque eñengæimpa, ante cædinque mänintaa wepæ pipo pipo cægacäimpa. Ayæ né eñenänäni tömänäni baonga wepæ pipo pipo cædinque tömengä ïimaï angacäimpa.

20 “Wængongui, Botö pönö ämo eñenique mïnitö Ao ante eñente cæmïni ïnique mönö godongämæ waa cæcæimpa, ante nänö wææ angaïnö beyænque ii wepæ impa. ïnique ii wepæ émontaa adinque mönö Ao ante mänïne ante eñente cæcæimpa,” ante Möitee wodi apænegacäimpa.

21 Ayæ æmontaiconga wepæ pipo pipo cædinque tömengä mänincönë Wængongui beyæ näni cæincooga wepæ pipo pipo cægacäimpa.

22 Ayæ wodo tömancooga ante Wængongui, Wepæ tönö ñä mënongacæimpa, änique wææ angä cægadänimpa.

Íñæmpa wepæ gowedämaï iñonte mönö wënæ wénæ cæmö adinque Wængongui né panguënengä inte ædö cæte pönö ata cæpoquingää.

Codito wepæ beyænque mönö mïmö

m  nongac  impa

23   n  d   ongoncoo ba   inguipoga n  ni adoba   badongaincoo inc   c  ning   w  nonte ate wep   t  n       n   m  nonganqu  n  n  ni ingad  nimpa. W  et   n  w     n  d   W  engongu   weca gote m  n   ongonguinque m  n   adocanque n   wa  m   p  n   i  n  ng   wep   bey  n       n   m  nonganqu  n  m   imompa. **24** Ed     n  d   W  engongu   n  n   owocon   ba   ante waod  ni   n  mpoca n  ni t  iy   wa  m   p  n   badongainc  n   m  n   Codito guiid  ma   ingac  impa. W  et     n  d   inc   a  dinque t  m  ng   m  n   bey   ante W  engongu   weca guiid  inque a ongongampa.

25 W  engongu   qu  , ante inguipoga n   godong       n  n  p  n   i  n  ng   guiqu  n   w  i   n  m   wep   a  nte p  n  inque c  ning   wep   inc   a  nte p  n  inque wadepo i  n   adopoque wadepo i  n   adopoque T  iy   Wa  emonc  n   P  n   guiicampa. M  n   Codito guiqu  n   inguipoga n   qu  w  ng   ba   w  i   adoba   i  n  ng   inte w  i   w  et   w  et   godonc  te ante   n  d   a  i   guigac  impa. W  et     n  d   adopoque a  i   guiid  inque t  m  ng   n  m   wep   adopoque godongac  impa. **26** Ed   inguipoga n   qu  w  n  ni n  ni c  i   ba   c  c   ba   t  m  ng   W  engongu   inguipoga n  n   bad  ned   m   caate w  ed  inque want   want   i  n   c  dinque     o   ganca t  empo caate w  c  edong  impa. W  et   m  n   waocabo t  m  m   ped  nguipoga m  n   qu  w  n   wodo i  n  que bayonte t  m  ng       o   p  n   adopoque p  n   p  n  inque w  n   w  n   m  n   c  d   ante     m  wo wido c  c  te ante n  m   wep   godongac  impa.

27 Mönö waocabo guiquënë nē wænguümö ïnömo inte adopoque wænte ate Wængonguü weca pö gongæñömonte tömengä apænte ancæcäimpa.
28 Mönö waocabo nanguü ïmö ïñömonte mönö Codito ïñömö wënæ wënæ mönö cædö ante mongæninque adopoque nämä godöningue wængacäimpa. Ayæ wæætë pöninque tömengä wii mönö wënæ wënæ cædö mongæncæte ante poncæcäimpa. Wæætë tömengä nänö ponguïnö ante nē wänö cömö ïñömonte tömengä, Quëwencæmïnimpa, ante mönö ïmonte æncæte ante poncæcäimpa.

10

1 Iincayæ ate nē Ponguingä ïñömö, Wængonguü quü, ante nämä wepæ eyepæ godoncæcäimpa, ante odömoncæte ante cædinque Wængonguü, Iimaï cæte cæningä wepæ pönöedäni, ante do wææ angacäimpa. Incæte märii wepæ Wængonguü nänö wææ angaïmæ ïñömö wii eyepæ godonguü aenguü impa. Iñinque mänimæ tömengä nänö wææ angaïmæ beyænque waocä ædö cæte ædæmö eñente picængä baï baquingää. Iñæmpa idægoidi ïñömö wadepo iñö wadepo iñö wepæancaa godöningue Wængonguü weca pö ædæ wææninque, Bitö Tæiyæ Waëmö ïmidö anguënë, ante apænecæte ante pönäni incæte töménäni tömengä nänö wææ angaïnö beyænque picænäni baï dicæ badäniyaa. **2** Tömengä nänö wææ angaïnö eyepæ i baï töménäni adopoque godöningue idæwaa godoncædönänimpa. Edæ, Wængonguü ingampa, ante nē cædäni ïñömö mäninque godöningue ædæmö ñä mënongate

bacædönänimpa. Ayæ iincayæ ate tömënäni, Wentamö entawente wænguü wæ, ante nämä apænte wædämäi incædönänimpa.

³ Edæ wii mänömaä impa. Wæætë, Botö wënæ wënæ cæte awædö, ante wæætë wæætë näni pönente wæquinque tömënäni wadepo iñö wadepo iñö godönönänimpa. ⁴ Edæ, Möni wënæ wënæ cægäinö ante mënongacæimpä, ante godöñönäni wagada onguiñæ wepæ tönö caboda wepæ eyepæ ïmæmpa diyæ mënongaquü.

⁵ Cæningä wepæ wii eyepæ impa, ante wædinque Codito inguipoga pöninque iïmaä ante apænegacæimpä.

“Wængonguü eñëmi. Cæningä baö näni wænonte pönönö tönö cænguü bequü näni, Wængonguü quü, ante pönönö adinque bitö edæ wii æñëmi ingabiimpa.

Wæætë botö Waobo baquinque bitö botö baö ante badongabiimpa.

⁶ Waodäni, Wængonguü quü, ante iya tämöni ate Wængonguü waa acæcæimpä, ante täñönäni bitö wii tobi ingabiimpa. Tömënäni, Wënæ wënæ möni cædö ante Wængonguü pönö wido cæcæcæimpä, ante pönöñönänite bitö Baa angabiimpa.

⁷ Ante adinque botö, ‘Wængonguü eñëmi. Dodäni botö ïmotedö ante yewæmöninque, Tömengä inguipoga pöninque iïmaä cæcæcæimpä, ante näni yewæmongaïnö baï cædinque botö bitö äñö eñente cæcæte ante pöninque a ongömoï ae,’ antabopa,”

⁸ Möitee wodi guiquenë, Cænñänäni ïnänite wænöninque münitö, Wængonguü quü, ante pædæ

godöninque cænguü töönö bequü godoncæmïnimpä, ante wææ angacäimpa. Incæte mönö Codito Mæmpocä ingante täno apænedinque, Waodäni cæningä näni wænonte pönönö töönö cænguü bequü näni, Wængonguü quü, ante pönönö adinque bitö wii æinëmi ingabiimpa. Wængonguü quü, ante iya tämöni ate Wængonguü waa acæcäimpa, ante ayæ, Wënæ wënæ möni cædö ante Wængonguü pönö wido cæcæcäimpa, ante pönö tañönäni bitö Baa ante wii tobi ingabiimpa, ante Codito apænegacäimpa. ⁹ Ayæ, “Bitö änö cæcæte ante pöninque a ongömoü ae,” angacäimpa. Änique tömengä, ïine botö angaïnö ïñömö ædæmö èñenguüne bate ongongæimpa, ante cædinque Möitee wodi wëenëñedë näno angaïne ante da godonte baï cægacäimpa. ¹⁰ Ayæ Wængonguü näno änö ante në èñente cæcä inte Itota Codito, Wængonguü quü, ante baonga èñadinque adopoque wæninque nämä wepæ eyepæ godongä beyænque mönö wæætë Wængonguü ayongä tæiyæ waëmö èwocamö bate quëwëmompa.

¹¹ Wængonguü quü, ante në godönäni guiquenë tömänäni ïimö ïñö ïimö ïñö adiyæ gongænte Wængonguü beyæ ante cædänipa. Mänömaï wæætë wæætë godöninque ado ado godönäni beyænque tömänäni wënæ wënæ näni cædö ante ædö cæte wido cæte baquü. ¹² Mäningä mönö beyæ në nö Godongaingä guiquenë adopoque godöninque ïinque baganca eyepæ pönü godöninque Wængonguü tömämengä ïnö æi tæ contate ongongampa. ¹³ Mänömaï ongöinque, Botö ïmote piïnte cædäni ïnänite Wængonguü æyedënö botö nempo pönongä æninque botö tæi èmömö inte në ämo baquümoo,

ante Codito ñöwo ganca wänö congampa. ¹⁴ Edæ tömengä pönö badongä ate mönö tæiyæ waëmö ëwocate quëwëmë bayömönte tömengä adoque pönü nänö godongaïnö beyænque, Ædæmë picæmëni bacæmënimpa, ante do badongacäimpa. ¹⁵ Mäninö ante Wængongui Tæiyæ Waëmö Önöwoca mönö ïmonte adobaï apænecampa. Tömengä täno apænegacäimpa.

¹⁶ “Mönö Awënë ïimaï angacäimpa. Mäniñedë ate ïincayæ ate, botö pönö cæbo ate Ao änäni ïinque mönö godongämæ waa cæte quëwengæimpa, ante ïinque cæcæte ante ïimaï cæcæboimpa, angacäimpa.

Botö pönö apænebo ëñëninque tömënäni, ïimaï cædinäni, ante botö wææ angaïnö incæ mümönë entawencædänimpa.

Botö pönö apænebo ëñëninque mänïne ante ocai encate ëñencædänimpa.

¹⁷ Ayæ, Wënæ wënæ näni cædö ante ñimpö cædinque botö pönënämaï incæboimpa. Ëñenämaï näni cædö ante botö wæætë wæætë änämaï incæboimpa,” angampa.

¹⁸ ïinque tömengä pönö ñimpö cæcä ate mönö edæ, Wënæ wënæ mönö cædö beyæ pänämäi incæcäimpa, ante quïnante godömenque godongui. ïñæmpa tömengä dobæ ñimpö cægacäimpa.

Mönö Wængongui weca pongæimpa, ante

¹⁹ ïñänäni ëñeedäni. Tæiyæ Waëmö Pönü Oncönë pö guiite baï mönö Itota wepæ beyænque guïñenämaï inte Wængongui weca do guiquenëmö ïmomba. ²⁰ Weocoo mänincönë näni wææ

cægaincoo wægo tē baï Itota baö adobaï wangö cote ingatimpa. Mänömaï beyæ odemö mïñinemö wi ænete baï i adinque mönö quëwenguïnemö guiidinque Wængonguï weca edæ do guimompa.

21 Wængonguï nänö godongämæ owocabo iñömonte, Wængonguï qui, ante né Godongä Ñænængä poni ïnongä iñömö adocä Itota iñömö mönö imonte né aacä ïnongä ingampa. **22** Mänömaï beyæ mönö Wængonguï weca pö guicæimpa. Wëenëñedë wentamö mönö entawënö ante Itota nämä wepæ inte nää mënongacä ate mönö nämä apænte nö cæinëmö inte guicæimpa. Ayæ mönö baö waëmömæ äate baï ëmömö ïnique mönö, Wængonguï tömengä nänö änö baï cöwë ædæmö cæcæcæimpa, ante wede pönëninque mönö guïñëñämäi inte tömengä weca do guicæimpa. **23** Botö cöwë pönö cæcæboimpa, ante né angaingä iñömö né ædæmö cæcä ingampa, ante adinque mönö, Tömengä nänö änö baï cæcä beyænque watapæ bacæimpa, ante mönö pönëno ante cöwë wido cædämaï inte mönö pönengæimpa.

24 Ayæ, Mönö pönencabo tömämö waadete pönëninque waa cæte quëwengæimpa, ante cæcæte ante pönente adinque mönö wacä ingä wacä ingä iñmai godö cæcæimpa. **25** Pancadäniya Wængonguï ingante godongämæ apænecæte ante pönämäi inte wadæ godäni incæte tömënäni näni cæi baï mönö adobai cædämaï ingæimpa. Wæætë, Codito nänö ponguiönæ oo poni impa, ate pönente wædinque mönö pönencabo iñömonte mönö wacä ingä wacä ingä edæ waadete apænedinque, Wængonguï gämænö pöninque watapæ quëwëmïni incæmïnimpa, ante apænecæimpa.

26 Wængonguï nö nänö änö ante do ëñënimö inte mönö, Wii ëñëinëwædö, änique godömenque wënæ wënæ cæmö ïnique edæ wënæ wënæ mönö cædö ante mënongaquimæ ante edæ wepæ dæ ä baï babaimpa. **27** Wæætë mänömaï ancaa ëñënamäi cæmö ïnique mönö Wængonguï nänö apænte ante panguimämoque ante guïñente wæcömaïmompa. Edæ mönö Baa ante godömenque wënæ wënæ cæmö ïnique Wængonguï ingante në püñäni näni gonte wænguimämoque ante, Mönö adobaï gonte wæncæ wæ, ante guïñente wæcömaïmompa. **28** Möitee wodi nänö wææ angaïnö ante, Wii ëñëinëwædö, ante adocanque në angä iñongante Waoda mënaa ïna incæ waodäni mengää go adocanque ïnäni incæ, Mänömaïnö ante apænecä èñentamönipa, ante apænedäni èñëniisque në åningä ingante waadedämaï inte godö wænongadänimpa.

29 Ìnique adocanque Wængonguï Wengä ingante pïnä gäwate baï cædinque Baa angä adinque tömengä ingante Wængonguï ædö cæte pänämäi inguingää. Wængonguï, Botö pönö æmo ate münitö Ao ämïni ïnique mönö godongämæ waa cæte quëwengæimpa, ante nänö angaïnö ïnique bacæimpa, ante cædinque Itota nämä wepæ inte mönö ïmonte ñä mënongacä beyæ tömengä ayongä tæiyæ waëmö ëwocamö bagamöimpa. Incæte adocanque Itota nänö në ñä mënongadingä ïnongä inte, Itota wepæ wii waëmö i awædö, ante püngä adinque Wængonguï ædö cæte apænte ante pänämäi inguingää. Ayæ Wængonguï Önöwoca në waadete pönö cædongä iñongante adocanque badete tocä adinque Wængonguï tömengä ingante ædö cæte

pänämaï inguingää. Edæ Möitee wodi nänö wææ angaïnö ante Baa änäni ïnänite wædænque päninque Wængonguï ïnäni ïnänite godömenque nanguï pöni pancæcäimpa, ante pönëmïnyaa.

³⁰ Wængonguï, “Botö tömömo né panguïmo ïmopa. Wiwa näni cædinö beyæ eyepæ pöni godö pämö wæcædänimpa,” angacäimpa. Ayæ, “Botö né Awënë ïnömo inte botö quïnäni ïnänite apænte ancæboimpa,” angacäimpa. Mönö ïñömö, Mänömaïnö ante né apænte pancæ angaingä ingante æbänö ingää, ante do ëñëmompa. ³¹ Edæ Wængonguï né Quëwengä ïnongä inte edæ ængüi badinque bæi ongonte pangä wæcæ wæ, ante mönü nanguï guïñëñate wæcæimpa.

³² Wëenëñedë Wængonguï apænecä ëñëmïni inte münitö tæcæ ñäö baï entawëmïni ate wadäni pö piïnte guëadö guëa cæyönäni münitö mïni caate wæquinque tæi ongöninque godömenque cæmünitapa. Mänömaï mïni cædinö ante ñöwo pönëedäni. ³³ Pancayedëña ïñömö né piïnte cædäni tömänäni ayönäni münitö ïmïnite badete todinque pänänitapa. Pancayedëña guiquëñë münitö töniñadäni adobaï caate wæyönänite münitö, Adocabomöni ïmönipa, ante baï cædinque né caate wædäni töö godongämæ ongomünitapa. ³⁴ Wadäni ïnänite tee mönedäni adinque münitö tömënäni tee mönete näni wædö ante pönëninque tömënäni töö godongämæ wæmünitapa. Ayæ, Mönö mäinc oo öönædë godömenque waa pöni ongoncoo inte cöwë ongongæimpa, ante ëñëmïni ïñöminite wadäni inguipoga münitö éadincoo ö ænäni adinque münitö wædämaï inte watapæ tomünitapa. ³⁵ Ìninque, Mönö wede pönënö beyænque eyepæ pöni ænguïmö

īmompa, ante ēñēninque mäninö müni wede pönënö ante wido cædämaï ïedäni. ³⁶ Ayæ, Wængonguï nänö änö ante ēñente cæmöni ate tömengä, Pönömo æncæmïnimpa, ante nänö angaincoo ante cöwë pönongä æncæmönimpa, ante cædinque münitö wæntædämäi inte ee cæquénemini ìmïnipa. ³⁷ Edæ Wængonguï beyæ ante do yewæmongatimpa.

“Wantæ wantæ ate né Ponguingä mönö änongä ïnömö do poncæcäimpa.

Edæ tömengä nänö angaïönæ iinque bayonte tömengä eyepæ poni poncæcäimpa.

³⁸ Né nö cæte quëwënongä incæ tömengä nänö wede pönënö beyænque quëwencæcäimpa.

Adocä wæætë guïñente wædinque wodii wïnongä adinque,

botö tömengä ingante adinque wii tobaïmopa,” ante Wængonguï beyæ yewæmongatimpa.

³⁹ Mönö guiquenë tömënäni näni cæi baï cædämäi ïnömö inte wii guïñente wædömö inte wodii wïnönämaï ïmompa. Edæ wodii wïnonte baï mönö æmæwo ëwente baquénemö ïmompa. Wæætë edæ tömengä ængä beyænque mönö quëwenguinque tömengä ingante wede pönëmö ïmompa.

11

Mönö wede pönënö ante

¹ Wængonguï pönö cæcä ate watapæ bacæimpa, ante mönö pönënö ante mönö, Wængonguï ayæ cædämäi ingä incæte cöwë cæquingä ingampa, ante wede pönëmompa. Awinca adämäi èmömö incæ mönö mümöno wede pönëninqué awinca do ate èmonte baï ëwocamö inte mönö, Näwangä

bacæimpa, ante do ëñëmö ïmompa. ² Dodäni wede pönénäni iñönänite Wængonguü, Mïni wede pönënö beyænque botö münitö ïmünite waa abopa, ante apænegacäimpa.

³ Wængonguü inguipo tönö ïimönæ tömäo badoncæte ante cæyongä quiëmë impa ænte badonguingää. Iñæmpa dæ angatimpa. Iñinque mönö në acoo dæ äñonte mänincoo ænämaï inte tömengä wæætë mä pönënique angä beyænque mönö në acoo do bagatimpa. Mänömaï ingatimpa, ante wede pönënique mönö Ao ämompa.

Dodäni näni wede pönengaïnö

Abedo wodi

⁴ Abedo wodi iñömö Wængonguü näno angaïnö ante wede pönënique, Wængonguü qui, ante nö cæte godöninque Caïnö wodi wæætë önömonque näno godönö baï wii godongacäimpa. Tömengä mänömaï wede pönente cæcä adinque Wængonguü, Abedo bitö nö cæte pönömi æmopa, ante apænegacäimpa. Iñinque do wænte gogaingä iñongä incæte Abedo wodi, Botö wede pönente cægaï baï adobaï wede pönente cæedäni, ante ñöwo ganca ayæ apænete baï apænecampa.

Ënoco wodi

⁵ Ënoco wodi guiquenë në wede pönengä iñongante Wængonguü, Ënoco ëñëmi. Bitö botö në waa adömi inte bitö wænguënämämo ante wædämaï inte pöe, äninque inque iñongante ö ænte wo ææntodongä æigacäimpa. Äite gocä ate wadäni ancaa diqui diqui müninque Wængonguü näno në wo æntodongä ingante adämaï ingadänimpa. Edæ

tömengä ingante Wængonguü ayæ ææntodönämaï iñongante wadäni, Ænoco wede pönengä ingante Wængonguü waa acampa, ante do eñenönänimpa.

6 Edæ Wængonguü weca poncæte ante cædinque waocä, Wængonguü nē Quëwengä ingampa, ante wede pönenguénengä ingampa. Ayæ adobai, Wængonguü ingante nē diqui diqui mümö iñömonte tömengä, Pöe, änique pönö waa cæcamp, ante wede pönënique nē poncæ cæcä pongampa. Mänömaïnö ante nē wede pönënäniqe Wængonguü weca pönänipa. Mäninö ante nē wede pönänämaï ingä guiquené tömengä ingante Wængonguü ædö cæte waa aquingää. Edæ waa adämaï ingampa.

Docä Nöwee wodi

7 Nöwee wodi Docä näni änongä guiquené, Æbänö baquü, ante adämaï iñongante Wængonguü, Nöwee eñëmi. Bitö adämaï imämo oo pongæimpa cæbii. Angä eñente guïñente wædinque nē wede pönengä inte tömengä näni wencabo näni guiite quëwenguinque wipo ñænængade impo incæ ñænæ oncö baï badongä ate guiite quëwengadänimpa. Në wede pönënäniqe näni nö entawënö baï adobaï nö nänö entawenguinque Nöwee wodi wede pönente cægacäimpa. ïninque tömengä adocanque wede pönënique mänömaï cædingä iñongante wadäni guiquené näni apænte wænguinque Baa angadänimpa.

Abadäö wodi

8 Abadäö wodi guiquené tömengä wede pönengä iñongante Wængonguü, Abadäö eñëmi. Botö pönömo bitö ængüimæ ante botö odömömo goe. Angä eñenique, Æbæmë impa, ante adämaï iñongä

inte Abadääö wede pönéninque ëñente cædinque do gogacäimpa. ⁹ Mänömaï wede pönéninque wadäni némæ gote wacä ïnongä inte wantæ ïñö quëwengä baï inte æmontaicönë owogacäimpa. Ayæ Wængonguï nänö angaïmæ në ænguïna ïnöna inte tömengä wengä Itæca wodi adobaï tömengä wengä Aacobo wodi adobaï wantæ ïñö quëwente baï æmontaicönenque owote quëwengadaimpa. ¹⁰ Wængonguï doyedë pönü, Waodäni näni öönædë quëwenguïñömö ante botö ïimaï badoncæboimpa, ante nämä nänö pönénö baï tæï gönonte mænongacäimpa. Abadääö ïñömö, Botö mänii ïñömö owocæboimpa, ante në wædongä inte wede pönéninque piyænë cædinque æmontaicönenque owote inguipoga quëwengacäimpa.

¹¹ Mönö ïmonte pönéninque në ædæmö aacä ïnongä inte Wængonguï ïñömö tömengä nänö änïnö baï cöwë cæcæcäimpa, ante në wede pönénä ïñömö Tada wodi ingadäimpa. Mänömaï beyæ tömënä owæntadä ïñönante Wængonguï pönü cæcä æninque tömënä picængadedä ïnönä inte tæï piñæninque yædëmadä bate wëñængä mangadäimpa. ¹² Abadääö wodi wede pönéninque tæï piñænte tapæicä ate wëñængä ëñagacäimpa. ïnique adocanque picængadecä inte në wænte baï ïnongä inte wede pönengä beyænque mönö tömengä nänö pæïmö yebæninque nëmoncoo öönædë owocoo nanguï pönü i baï mönö ïñömö adobaï nanguï pönü ïmompa. Ëmönaicoo gäwapæ yæwedeca öñoncoo nanguï pönü i baï mönö tömengä pæïmö ïmö adobaï nanguï pönü ïñomonte mönö,

Mänimpomö ïmompa, ante ædö cæte anguïï.

13 Mänïnäni tömänäni wede pönente quëwënönäni inte wængadänimpa. Wængonguiï nänö, Pönö cæcæboimpa, angaincoo ayæ ænämäï ïnäni inte tömänäni gobæ ongoncoo gomö ate baï, Cöwë æncæmönimpa, ante wede pönente piyænë cæte quëwengadänimpa. Wadäni némæ wabæca quëwente baï quëwënique tömänäni, Wïï mönitö ömæ iñonte mönitö wamöni inte quëwëmönipa, ante inguipoga owogadänimpa.
14 Mänömaïnö ante në änäni iñömö, Tömëmöni ömæ ante diqui diqui mëmöni ïmönipa, ante quëwënänipa. **15** Dodäni iñömö do näni ëmö cæte pongaïmæ ante pönente wædäni inte baï tömänäni do adodö gocædönänimpa. **16** Wæætë adodö mäniömæ näni quëwengaïmæ wïï goïnënique tömänäni, Mönö öönædë godömenque waëmömæ poniï gote quëwengæimpa, ante goïnente wægadänimpa. Iñinque wadäni Wængonguiï ingante, Bitö në waëmömæ goïnente wædäni tömänäni Wængonguiïmä ïmipa cæbii, ante änäni incæ tömengä wæætë, Iñæmpa në wædönäni tömänäni quëwenguïñömö näni wædö ante botö do eyepæ mænongaboimpa, änique guïñënämäï inte nanguï tocampa.

Abadääö tönö Itæca

17 Wængonguiï, Abadääö æbänö botö ïmote ëñente cæquingää, ante acæte ante angä ëñënique Abadääö wodi në wede pönënongä inte tömengä wengä Itæca ingante, Wængonguiï quiï, ante godongacäimpa. Edæ Abadääö ingante doyedë apænedinque Wængonguiï, Bitö pæïnäni nanguï

ïnäni inte ïimæ æncædänimpa, ante do angä ëñengacäimpa. Incæte Wængonguï mänömaïnö angä ante në ëñëningä incæ tömengä wengä adocanque poni ïnongä inte Abadäö, Wængonguï quingä ingampa, ante godoncæ cægacäimpa. ¹⁸ Adocä tömengä wengä ingantedö ante Wængonguï doyedë Abadäö ingante apænedinque, Bitö wengä Itæca pæñänique ïnänitedö ante botö, Abadäö pæñäni ïnänipa, angacäimpa. ¹⁹ Incæte Itæca wodi adocanque poni ïñongante Abadäö wodi, Botö wengä do wængä incæte Wængonguï, Ñäni ömæmoe, angä ïnique do ñäni ömæmömaingampa, ante wede pönëinque godoncæ cægacäimpa. Wængonguï guiquenë, Ee ae, ante wææ angä beyænque tömengä wengä ingante wænönämäi ingacäimpa. ïnique Itæca wodi do wæningä inte baï ñäni ömæmonte baï ayæ quëwengacäimpa.

Itæca, Aacobo, Ootee

²⁰ Itæca wodi adobaï, Wængonguï æbänö cæquingää, ante wede nänö pönënö beyænque ëñëningä inte edæ picængadecä badinque Aacobo wodi tönö Etawoo wodi ïnate apænedinque, Wængonguï mïnatö ïmïnate ïimaï pönö waa cæcæcäimpa, ante waa apænegacäimpa.

²¹ Aacobo wodi ïñömö, Wængonguï æbänö cæquingää, ante wede nänö pönënö beyænque do ëñëningä inte wæncæ cæte öñöninque tömengä nänömoda Ootee wodi wëna ïnate, Mïnatö ïmïnate Wængonguï pönö waa cæcæcäimpa, ante waa apænegacäimpa. Ayæ ongontoca da cæte ongonte ædæ wææninque, Wængonguï bitö waëmö poni

ïnömi inte cæquümidö anguënë, ante watapæ apænegacäimpa.

22 Ootee wodi guiquënë, Wantæ ïñö wæncæboimpa, änique, Mönö idægocabo mönö pæinäni incæ Equitobæ wantæpiyæ quëwënäni ate Wængongui ænte mäocä wadæ gocædänimpa, ante tömengä nänö wede pönönö beyænque ëñenique ïimaï angacäimpa. Godinque botö bayetoca ingaï ee ænte næænte godinque da wencæmünimpa, angacäimpa.

Möitee wodi

23 Möitee wodi mæmpoda guiquënë wëñængä ëñacä ate, Wïi Önonganque ingampa. Waëmö wëñængä awædö, ante adinque ïimaï cægadaimpa. Mäniñedë Equitobæ awënë odehye ïñömö, Onguiñængä ëñacä adinque do wænongæimpa, angä incæte tömëna guïñenämaï inte tömëna wede näna pönönö beyænque wëñængä Möitee ingante apäicä mengää go adocanque mämonque wë wodonte mangadaimpa.

24 Möitee wodi guiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante né wede pönönongä inte edæ Baa angacäimpa. **25** Wæætë edæ, Botö caate wæquinque botö Wængongui quïnäni tönö godongämæ cæcæboimpa, ante cædinque Möitee wodi, Equitoidi näni wïwa cæte töinö adinque botö wantæ ïñö incæ wïi toïnente awædö, ante wido cægacäimpa. **26** Wængongui iincayæ ate eyepæ poni pönongä æncæboimpa, ante wede pönénique tömengä mäniñö ante mïmöno

gomö ate baï pönengacäimpa. Ayæ Equitobæ quëwënäni waëmoncoo poni näni mäincoo ante adinque, Önoncooqe ëwenguincooqe i awædö, ante Möitee edæ Baa angacäimpa. Wæætë edæ pünte badete todäni wæcä incæte tömengä, Codito beyænque impa, ante pönënique godömenque waa poni togacäimpa.

27 Tömengä iñömö, Awënë odehye Padaönö ængui badinque püngä wæcæ wæ, ante guñente wædämaï inte wæætë wede pönënique Equitobæ ëmö cæte gogacäimpa. Ayæ Wængongui næ Quëwengä mönü awinka adämaï iñongä ingante Möitee wodi iñömö næ awinka gomö acä baï ëmongä inte wæntæye badämaï inte godömenque cægacäimpa. **28** Ayæ, Bamoncadë eñadäni iñänite næ ëwënongä incæ godö wænoncæcäimpa, ante Wængongui angä eñenique Möitee wodi wæætë, Næ ëwënongä nänö wodo pænta goquï ingæimpa, ante wede pönënique cægacäimpa. Tömengä wadäni idægoidi tönö Patowa ææmæ mönü cæmæ baï mä cængacäimpa. Ayæ, Næ ëwënongä incæ mönü idægocabo bamoncadë eñadäni iñänite wænönämäi incæcäimpa, ante wææ cæcæte ante cædinque Möitee næ wede pönënongä inte wadäni tönö godongämæ odemompaa wepæ öni paagacäimpa.

29 Idægoidi guiquenæ wede pönënique gäwapæ Opatawæmæ näni ämæ goyæ go næ gongæmæ ate tæcæguedämæ poni tao gogadänimpa. Equitoidi guiquenæ, Taadö bapa, mönü taocæimpa, ante cæyönänite æpæmpo becadote wængadänimpa.

Adacaba wodi

30 Idægoidi näni wede pönënö beyænque Eedicoo näni quëwëñömö yabæque näni wææ cægainca incæ näwæ cabænte wæængatimpa. Edæ idægoidi önompo æmæmpoque go mëönaa mänimpoönæ iñonte yabæque godongämæ cægonte godäni ate cabænte wæængatimpa. **31** Onquiyængä Adacaba iñömö mäincoo beyæ ante në towente në quëwengä iñongä incæte tömengä wede nänö pönënö beyænque iimaï cæte müingä quëwengacäimpa. Idægoda mënaa, Eedicoo iñömö æbänö quëwénäni, ante acæte ante awëmö pö guiida adinque Adacaba wodi, Ee pöeda, angä beyænque idægoidi wæætë ëñenämaï iñäni iñänite wænöninque tömengä ingante ata cæpodäni quëwengacäimpa.

Wadäni näni wede pönengaïnö

32 Quïnante godömenque ante apænequümoo. Iñäni në wede pönënäni näni cægaïnö ante botö æiquedö apænequümoo. Guedeonö wodi tönö Badaco wodi ingadaimpa. Ayæ wææ Tantöö wodi tönö Yepetee wodi ingadaimpa. Ayæ wææ Awënë Dabii wodi tönö Tämoedo wodi ingadaimpa. Mäninäni tönö Wængonguï beyæ në apænegaïnäni wodi tömänäni wede näni pönënö beyænque iimaï cædinque nanguï cægadänimpa.

33 Në wede pönënäni iñömö tæï ëmonte badinque wabæca awënë odeyeidi nempo quëwénäni iñänite bæ tadinque wido cægadänimpa. Pancadäniya wede pönëninque wadäni beyæ wææ änique nö cægadänimpa. Wacä, Cæcæboimpa, änique do cæquenengä incæ wii cæcä iñinque në pönënäni pancadäniya, Bitö änö cæcæbiimpa, änäni ëñeninque do cægacäimpa. Pancadäniya

näni wede pönënö beyænque mëñeidi incæ ecadämaï ïnäni bagadänimpa. ³⁴ Gonga nanguï wo bæco adinque pancadäniya wede näni pönënö beyænque mönæ ëmongatimpa. Wadäni yaëmenca tamencacæ cädäni wædinque në pönënäni pancadäniya aamö cædinque müñäni quëwengadänimpa. Aquïi pöni ïnñäni inte në wede pönënäni pancadäniya tæi piñænte bagadänimpa. Wabæca tontadoidi wænoncæ pönäni adinque në pönënäni pancadäniya wæætë tæi piñæninque wido cädäni gogadänimpa. ³⁵ Tömënäni guiidënäni näne wænäni ate onquiyænäni wede näni pönënö beyænque do wænñäni quëwënäni ate ængadänimpa.

Näni caate wægaïnö

Ayæ adobaï në pönënäni ïnänite wïwa cädäni caate wæyonänite wacä, Ata cæpobo goquïmi, angä incæte në caate wædönäni pancadäniya wæætë, Ee abi caate wæwëmoe, änänitapa. Tömënäni, Botö ïncayæ ate ñäni ömæmöninque caate botö wædö beyænque godömenque waa quëwencæboimpa, ante wææ äninquæ Ao änämaï ingadänimpa. ³⁶ Tömënäni näni wede pönënö beyæ pancadäniya ïnänite wadäni badete togadänimpa. Wadäni ïnänite wæætë tæi tæi pangadänimpa. Wadäni ïnänite wæætë yaëmengö ñä cæyæninque tee mönedäni wægadänimpa. ³⁷ Pancadäniya ïnänite dicaca tacadäni wængadänimpa. Pancadäniya ïnänite ta wiÿænäni wængadänimpa. Pancadäniya ïnänite yaëmenca yedäni wængadänimpa. Pancadäniya obega æmontai töön caboda æmontai badöninque mäninque wëñate mongæninque ömæpodäni

inte wæyönänite wadäni togænte päninque wïwa cægadänimpa. ³⁸ Tömänäni në wede pönänäni inte waa pöni iñäni iñönänite inguipogaque quëwänäni wææte wii tömänäni baï iñäni inte wënæ wënæ cægadänimpa. Në pönänäni iñömö pancadäniya, Aeyömömë gote quëwenguïmoo, ante pönente wædinque wodii wïnonte önomæca wayömö godinque äninquidi wayömö godinque oncontatodë guiidinque pancadäniya wë womöñönäni pancadäniya onguipodë ææ wote wë womongadänimpa.

³⁹ Ìnique Wængonguï tömänäni iñänite, Wede mïni pönënö adinque botö waa tobopa, ante apænegacäimpa. Incæte tömengä nänö, Pönö waa cæcæboimpa, angaïnö ante tömänäni mäniñedë ayæ ænämäi ingadänimpa. ⁴⁰ Edæ tömänäni adodänique wii æncædänimpa, angacäimpa. Wææte Codito godömenque pönongä æninque mönö watapæ quëwëñomonte tömänäni mönö tönö godongämæ æninque ædæmö picänäni baï bacædänimpa, ante Wængonguï mönö ïmonte waa cædinque tömänäni beyæ adobaï waa cægacäimpa.

12

Itota ingante mönö cöwë adinque quëwengæimpa, ante

¹ Ìnique boguumä bacoo owo baï mänänäni iñömö, Wængonguï cöwë pönö cæcæcäimpa, ante në wede pönengaïnäni iñömö adobaï bacoo ongönänipa. Edæ, Mönitö wede pönente möni cægaï baï mïnitö adobaï wede pönäninque iimäi cædäni, ante a ongonte baï apænedänipa cæmöö.

Tömänäni quingæ pogodo gocæte ante cædäni teëmencoo gä äadäni baï cædinque mönö adobaï oda caate mönö wædoncoo ante ñimpo cæcæimpa. Wënæ wënæ mönö cægaincoo ante, Ancaa cæte awædö, änique mönö wido cæcæimpa. Ayæ taadö ante Itota nänö odömongaïnque ante mönö edæ wæntædämaï inte tæï piñæninque pogodo gocæimpa. ² Mönö wede pönente æite godö taadö ante tömengä ïñömö né täno beyænte gogaingä ingampa. Tömengä adocä incæ mönö wede pönënö ante, Cöwë mänömaï bacæimpa, ante ædæmö badongaingä ingampa. Tömengä ïñömö wadäni tömengä ingante awæ timpodäni wæyongante badete todäni adinque tömengä, Mänömaï cædäni botö caate wædö beyænque botö iincayæ ate watapæ tocæboimpa, ante né ëñëningä inte piyænë cædinque caate wædinque wængacäimpa. Tömengä ñöwo ïñömö ñäni ömæmonte æite godinque Awënë Wængongui nänö contaimpaa tömämængä ïnö tæ contate Awënë bate ongöñongä mönö adocä Itota ingante æmö ate baï pönënique edæ tömengä miñæ tee empote pogodo gocæimpa.

³ Tömengä ïñömö né wïwa cædäni nanguï piïnte cædäni wæcä incæte piyænë cægacäimpa. ïnique mïnitö ïñömö, Wæntædämaï inte mïmö nangæ batawëñämaï ingæimpa, ante cædinque, Tömengä æbänö cægacäi, ante pönëedäni. ⁴ Ñöwo ganca mïnitö wënæ wënæ mïni cæinente wædö ante wido cæcæte ante mïnitö wængui beyæ wepæ dicæ gowete cæmïniyaa. ⁵ Ayæ Wængongui mönö wampo pönencæmöimpa, ante mönö ïmonte, Botö wëmïni godömenque cæcæmïnimpa, ante æbänö pönö an-

gacäi, ante münitö dicæ pönëmïniyaa. İïmaï angacäimpa, ante yewæmongatimpa.

“Botö wëmi eñëmi. Mönö Awënë bitö ïmite, Eñente cæcæbiimpa, ante pangä wædinque, bitö wæetë badete todämaï incæbiimpa.

Bitö ïmite, Eñenguëne quëwëe, angä eñente wædinque wæwënämaï incæbiimpa.

6 İñæmpa tömengä nänö në waadete pönënäni que ïnänite päninque

mönö Awënë iñömö, Eñencæmïnimpa, ante cæcampä.

Botö wëmïni, ante nänö në ængäinäni que ïnänite tömengä pangampa.”

7 Ante yewæmongatimpa cæmïni. Münitö caate wæmïni ïmïnitawo. İñæmpa wëñænäni ïnänite wæmpoidi dicæ pänämaï inguïnäniyaa. Mæmpo Wængonguï iñömö adobaï, Botö wëmïni ïmïnipa, ante edonque acæimpa, ante nanguï änique pangä caate wæmïnipa. İninque tömengä pangä wædinque münitö wæetë, Mönö eñente quëwenguïne ante Mæmpo Wængonguï pangampa, ante piyænë cæte ee amïni pancæcäimpa. **8** Tömengä wëñæmö iñömonte tömengä tömämö ïmonte edæ nanguï pante angampa. Incæte münitö pancamïniya ïmïnite tömengä pante änämaï ingantawo. İninque münitö, Wïi Wængonguï wëmöni ïmönipa. Wacä wëmöni ïmönipa, ante wæquenëmïni ïmïnipa.

9 Mönö mæmpoidi waodäni que ïnönäni inte nanguï änique pänäni adinque mönö, Mæmpocä ïnongä inte tömengä nänö cæquenënonque cædinque mönö ïmonte waa cæte pangantapa, ante tömënäni

ïnänite waa atamompa. Mönö Mæmpo Wængongui adobaï mönö ïmonte nanguï änique pangä adinque mönö quëwenguinque mönö tömengä ingante godömenque Ao ante ëñente cæcæimpa. ¹⁰ Mönö mæmpoidi guiquenë, Æbänö pönö waa cæquimoo, ante pönente ate mönö ïmonte edæ, Ëñencæminimpa, ante wantæ ïñö nanguï änäni ëñente cætamompa. Wængongui ïñömö edæ, Tæiyæ waëmö botö ëwocabo baï mïnitö adobaï tæiyæ waëmö ëwocadinqe watapæ quëwencæminimpa, ante cædinque mönö waa quëwenguinque ante pönö pangampa. ¹¹ Æcämenque mönö ïmonte nanguï änique pâna incæ tömengä pangä ate mönö caate wædinque dicæ quingæ watapæ tomongaa. ïñæmpa, Caate awædö, ante cöwë ämompa. Wæætë ïncayæ ate edæ doyedë näni pänö beyænque mönö né ëñente badömo ate mönö nö cæmö badinque gänë pönente entawëmompa.

Mönö wæquinque Wængongui apænecä ëñenämaï ïmompæ

¹² ïnique mïnitö guepænte wædïmïni inte edæ tæï piñæninque wæntædämaï inte nanguï cæedäni. Önoncapo nanguï guecapote wædïmïni inte edæ guecapodämaï inte ængæ gantite pogodo gote baï nanguï cæedäni. ¹³ Mönö cægonguinö, ante mïnitö taadö ante enga womïni mæmö ba ate né podä cædïnäni incæ podä cædämaï inte tömënäni näni waa baquinque mänïnönö töïnö gote waa cægoncædänimpa, ante godö waadete cæedäni.

¹⁴ Mönö godongämæ piyænë cæte quëwengæimpa, ante mïnitö nanguï tæï piñæninque waodäni tömänäni ïnänite gänë

pönente cæedäni. Ayæ, Æcänö tæiyæ waëmö ëwocadämaï ingää tömengä iñömö mönö Awënë ingante cówë adämaï incæcäimpa, ante pönente wædinque münitö, Mönö tömämö Wængonguï ayongä tæiyæ waëmö ëwocate quëwengæimpa, ante nanguï cæedäni. ¹⁵ Wængonguï pönö waadete nänö cædö ante mönö tömämö ænte entawengæimpa, ante cædinque münitö cówä adinque, Adocanque incæ ömætawengä iñämaï incæcäimpa, ante wææ cæedäni. Adocanque wæwente nänö quëwënö beyæ piiinte bate tedecä eñeninqe münitö, Wadäni näni wentamö mongænguinque adobaï piiinte badämaï incædänimpa, ante wææ cædinque në piiingä ingante godö wææ äedäni. ¹⁶ Ayæ mïni cabo incæ, Nänöogængä iñämaï iñongante adocanque incæ godö mönämaï incæcäimpa, ante cówä adinque wææ cæedäni.

Etawoo wodi iñömö tömengä bamoncadengä iñongä inte nänö nanguï ænguënencoo ante piiinte baï cædinque cænguinque æncæte ante tömancoo godonte beyæ adopoque ænte cængacäimpa. Münitö guiquënë, Inguiipogaque ante ænte to wædö, ante Etawoo wodi nänö pönëwente cægaïnö baï adocanque incæ cædämaï incæcäimpa, ante edæ wææ cæedäni. ¹⁷ Bamoncadengä inte nänö ænguënencoo ante do piiinte baï godöningä inte Etawoo wodi iincayæ ate, Pönömi æmoe, äñongante mæmpocä wæætë Baa angacäimpa, ante do eñëmïnipa. Edæ Ca ca wædinque tömengä, Æbänö cæte ænguïmoo, ante ancaa angä incæte mæmpocä do Baa äningä inte ñöwo wæætë wadö ante ædö cæte anguingää.

18 Onquiyabo Wængongui nänö gonga tänongä bæcobo ñænoque dodäni ponte godongämæ ongonte cægönäni baï münitö wii onquiyabo ñænoque pöminipa. Tömänäni wëmö mæ mämonte baï iñömö wini cai pæmämämo iñömö näni ponte wægañömö baï münitö wii pöminipa.

19 Todompeta näni ancadeca nanguü we öömämo dodäni näni eñente wægaämämo baï münitö wii adopämo eñemänipa. Wængongui wææ ante nänö tedepämo tömänäni näni eñente wægaämämo baï münitö wii adopämo eñemänipa. Mänämämo eñente guïñente wædinque tömänäni, Idæwaa ämipa. Ædö cæte godömenque eñenguumöni, ante wægadänimpa. **20** Edæ “Cæningä incæ onquiyaboga ponte cægongä adinque münitö tæi tacamini wæncæcäimpa,” ante wææ äñongante tömänäni ancai guïñente wædinque, Wængongui nänö wææ angainö ante mönitö ædö cæte ædæmö eñente cæquumöni, ante wægadänimpa. **21** Onquiyaboga näni ate guïñämämo adinque Möitee wodi incæ, “Ancai guïñente botö do do wäate baï wæbopa,” angacäimpa.

22 Münitö guiquenë Tiönoquidi näni änonquidi do ponte baï ewocamänipa. Edæ Wængongui né Quëwengä öönædë Eedotadëe baï nänö waëmö poni owoyömö münitö mäniñömö do ponte baï ewocamänipa. Wængongui anquedoidi æpodö müido ganca ïnönäni inte nanguü poni ïnäni godongämæ pö bee tente tömänäni näni watapæ ongöñömö münitö mäniñömö do ponte baï ewocamänipa. **23** Mönö Codito ingante godongämæ mönö pönencabo iñömö bamoncadënäni né ænguumö bayömonte mönö emöwo ante öönædë

yewæmöintaa do yewæmonte ongompa. Ìnique mïnitö adocabomïni badinque Wængonguï weca mönö waocabo tömämö ïmonte në apænte anguingä weca do pömïni ïmïnipa. Në nö cæte quëwengaïnäni wænte goyonänite Wængonguï ïnque badongä ate do ædæmö picænäni baï badänipa. Töménäni öñowoca weca mïnitö do ponte baï ëwocamïnipa. ²⁴ Wængonguï, Botö pönö cæbo ate mïnitö Ao ämïni ïnque mönö godongämæ waa cæte quëwengæimpa, ante nänö angainö ante Itota, ïnque bacæimpa, ante ædæmö badongacäimpa. Mïnitö ïñomö në badongaingä weca do pömïni ïmïnipa. Abedo wodi wepæ onguipoiya gowecä adinque Wængonguï wæætë në wænöningä ingante, Botö weca ongönämaï gobäwe, angacäimpa. Itota wepæ wii Abedo wodi wepæ baï imæ adinque Wængonguï wæætë, Itota wepæ petæ petæ gowedimæ beyænque botö weca pöedäni, ante cægacäimpa. Mänimæ Itota wepæ nänö petæ petæ gowegaïñomö mïnitö do ponte baï ëwocamïnipa.

²⁵ Mänömaï waëmö poni ïñomö do pömïni inte mïnitö në apænecä ingante Baa änämaï iedäni. Onquiyabo godongämæ ongönäni guiquenë inguipoga wææ angaingä ingante Baa änänäni ïñonänite tömengä ata cæpodämaï inte pangacäimpa cæminii. Öönædë ongonte në wææ angaingä ingante eñenämaï inte dadi èmænte wadæ gomö baï mönö godömenque pante wæquenemö ïñomonte tömengä cówë ata cæpodämaï incæcäimpa.

²⁶ Mänñedë tömengä nänö tedepämo beyænque inguipo wancæ wancæ cægatimpa. Ñöwo

iñömö tömengä, “Botö iincayæ ate inguipo adopoque poni wancæ wancæ cædinque öönædë adobai wancæ wancæ edæ cæcæboimpa,” angacäimpa. ²⁷ Tömengä, “Iincayæ ate adopoque poni cæcæboimpa,” angacäimpa, ante pönéninque mönü iimaï ante eñengæimpa. Tömengä adopoque wancæ wancæ cæcæ ate tömengä nänö badongaincoo oo poni ongoncoo iñömö tömancoo adoyedë ëwente bacæimpa. Quincoodö oo ongönämaï tæi ongoncoo i mänincooque ayæ a ongongæimpa, ²⁸ Iñinque mönü Awënë Odeye nempo quëwämö iñömö wancæ wancæ cædämaï inte tæi ongonguimö imompa, ante pönéninque mönü Wængonguï ingante waa ate pönente apænecæimpa. Mänömaï cædinque Wængonguï nääö baï nänö tæi èmömämo ate guñente wædinque tömengä beyæ cæcæimpa. ²⁹ Edæ mönü Wængonguï iñömö edæ gonga wo bæcoquï baï ingänö anguënë, ante ämo eñëmaïminipa.

13

Iimaï cæmö adinque Wængonguï waa tocæcäimpa, ante

¹ Minitö iñömö, Mönü caipæ imompa, ante müni waadete pönénö baï cædinque cöwë godongämæ waadete pönente cæedäni. ² Tömänäni iñänite edæ, Pöedäni, ante waadete cæedäni. Mänömaï cædinque pancadäniya, Botö weca ædänidö eñacæ pönänii, ante eñenämaï iñäni incæte do waa cædäni ate edæ, AE, Wængonguï nänö da pönönäni anquedoidi incæ botö weca pönänitapa, ante tæcæ abopa, ante todänipa.

³ Tee mōnete ongōnāni tōnō botō godongämæ tee mōnete wæcōmo baï ïmopa, ante pōnēnique mīnitō tōmēnāni ïnänite ante cōwē pōnēedäni. Pancadäniya ïnänite wadäni wïwa godö cädäni ate caate wæwëñönäni mīnitō adobaï pōnēnique, Mōnō baö adobaï ëñamö inte tōmēnāni tōnō godongämæ caate wæmō baï ïmoma, ante tōmēnāni ïnänite cōwē pōnēedäni.

⁴ Nänögængä ïnämäi ïñongante waocä nē godö guëa mongä tōnō nē godö wïwa towënäni ïñönänite Wængonguü mänänäni tōmänäni ïnänite do apænte ante pancæcäimpa cæminii. Mïna gæncaya adomïnaque guëa moncæminaimpa. Ayæ ñänönäni mōnique näna gæncaya quëwëna ate, Waa impa, ante mōnō waa acæimpa.

⁵ Wængonguü incæ, “Mīnitō ïmînite cōwē èmō cæte godämaï inte botō cōwē aacæboimpa,” angacäimpa. Mänömaï beyæ mīnitö godonte æinta ante æinente wædämaï inte mïni èadincooque èadinque piyænë cæte quëwëedäni. ⁶ ïnique Wængonguü beyæ ïimaï ante näni yewæmongainö baï ante mōnö wede pōnente apænemompa.

“Mōnō Awènë botō tōnō godongämæ cæcä ad-inque botö,

Waocä ædö cæte botö ïmote wënæ wënæ cæquingää, ante ëñëmo inte guïñenämaï incæboimpa.”

⁷ Në aadäni ïñömö mīnitö ïmînite Wængonguü näni änö ante nē apænedäni ïnänite ante pōnēnique mīnitö, Tōmēnäni ïñömö waa cædinque edæ watapæ quëwënänipa, ante pōnēedäni. Ayæ tōmēnäni näni wede pōnënö baï adobaï wede pōnēedäni.

8 Itota Codito iñömö wëenëñedë nänö ingaï baï ingä ñöwoönæ adobaï ingä inte tömengä adocä iincayæ ate cöwë adobaï incæcäimpa.

9 Wadäni, Wacä taadö odömonte apænebo ëñee, äñönänite tömänäni miñæ godämaï jädäni. Iñæmpa tömänäni cænguinque ante, Æbänö waa pöni cö cæquii, ante wææ änäni incæte mänii cænguincoo beyæ tömänäni wii godömenque watapæ quëwënänipa. Iñinque mänincoo cænte beyæ mönö mümö ædö cæte tæi piñænte entawenguü. Wæætë edæ Wængonguü nänö waadete pönö cædö beyænque mönö tæi piñænte entawengæimpa. **10** Æmontaicönë cædinque, Wængonguü qui, ante në godönäni iñömö tömänäni näni iya täimpaa godöninque pancaa cængüi ænte në cængüenänäni iñönäni incæte tömänäni mönö Codito mönö beyæ nämä nänö wepæ godongaïnö guiquenë ædö cæte ænguinänii.

11 Cænänäni iñänite wænönäni ate në godongä ñænængä pöni iñongä iñömö wepænque æninque, Wënæ wënæ moni cædinö ante Wængonguü pönö ñä mënongacæcäimpa, ante cædinque Tæiyæ Waëmö Pöni Oncönë wääne guiidinque godongampa. Godongä ate baonque, Wentamö mongænte awædö, ante æninque tömänäni näni quëwëñömö yabæque mao iya tangadänimpa. **12** Itota adobaï, Botö wepæ pönö mënongabo ate botö quimini iñömö tæiyæ waëmö ëwocate quëwencæmïnimpa, ante cædinque wentamö mönö entawënö ænte teëmë mongænte godinque tömänäni quëwëñömö wææ cædinemö tao godinque yabæque pöni guïñëñate wædinque

caate wængacäimpa cæmöö. ¹³ Tömengä yabæque poni guïñëñate wædinque näno tao gogaï baï mönö adoyömö tömengä weca tao gote ado guïñëñate wæcæimpa. ¹⁴ Ìñæmpa inguipoga mönö quëwëñömö tæi ongompa diyæ wantæpiyæ quëwenguïi. Wæætë öönædë lincayæ ate edæ mönö cöwë quëwenguïñömö ante æñente wædinque wänö cömompa.

¹⁵ Inique, Wængongui qui, ante cængui godönäni baï cædinque mönö ìñömö edæ, Itota èmöwo beyænque quëwëmönipa, ante né apænemö inte tömengä èmöwo ante Wængongui ingante apænedinque, Bitö tæi èmömi inte waa poni cæbipa, ante watapæ apænecæimpa. ¹⁶ Ayæ ñimpo cædämaï inte mïnitö wadäni ïnänite cöwë waa cæedäni. Ayæ wadäni ïnänite mïni mänincoo godö nénempomïni æncædänimpa. Mïnitö mänömaï, Wængongui qui, ante godonte baï cædinque nénempomïni adinque Wængongui mïni godönü ante waa acampa. ¹⁷ Mïnitö, Mönö ìmonte né ãnäni ïnänite mönö Ao ante èñengæimpa, ante pönëninqe né aadäni ïnänite cöwë èñente cæedäni. Tömänäni, Æbänö cæboo, ante adinque Wængongui apænte ancæcæimpa, ante èñeninqe guïñente wædäni inte nö cædinque aadänipa cæminii. Tömänäni mänömaï aadinqe watapæ tote quëwencædänimpa, ante mïnitö wæætë tömänäni näni änönö ante èñente cæedäni. Mïnitö wæætë èñenämaï ìmïni adinque tömänäni wæætë edæ, Ædö cæte aaquïmönii, ante wæwente badäni ïnique mïnitö adobaï todämaï ìmaïmïnipa.

¹⁸ Mïnitö beyæ ante Wængongui ingante apæneedäni. Mïnitö mïmö entawëmönï inte

wentamö entawënämaï ïmönipa, ante nämä apænte pönämönipa. Edæ, Quiëmë cæmö incæ mönö cöwë nö cæte quëwengæimpa, ante cæmönipa. **19** Botö münitö weca ocæ ëmænte pöinämopa. ïnique münitö Wængonguï ingante apænedinque, Wængonguï, bitö pönö cæbi ate Pabodo mönitö weca poncæcäimpa, ante apæneedäni, ante nanguï ämopa.

Münitö ïnïnite Wængonguï waa cæcæcäimpa, ante

20 Wængonguï inguipoga nänö badönämaï iñedë wëenëñedë poni änínque edæ, Mönö godongämæ waa cæte quëwengæimpa, ante tömengä nänö angainö baï cöwë në badongäingä inte ïimaï pönö cægacäimpa. Edæ mönö obegaidi baï iñömonte Awënë Itota iñömö mönö imonte në Aacä ñænængä ïnongä inte tömengä wepæ gowegaïmæ eyepæ poni godongä ate Wængonguï tömengä ingante, Eyepæ i, änínque, Näni ömæmoe, angä ñäni ömæmongacäimpa. Mänömaï gänë pönente në cægaingä inte Wængonguï iñömö, **21** waa poni pönongä ænte eyepæ entawënique münitö iñömö tömengä nänö änö baï cæcæmïnimp. Tömengä Itota Codito tönö godongämæ cædinque pönö cæcæ äñinque mönö tömengä nänö waa adoncooque entawengæimpa, ämopa. Itota Codito iñömö ñöwopämo incæ iincayæmämo incæ cöwë në tæï ëmönongä inte ñäö ëmongä amönipa, ante mönö tömengä ingante cöwë watapæ apænecæimpa. Mänömaï ingæimpa, ante botö, Amëë, ämopa.

22 ïñänäni ëñeedäni. Botö mäninö tömänö ante apænecæte ante wædænque poni yewæmömopa. ïnique mäninö botö ædæmö apænedinö ante

münitö piyænë cædinque ëñeedäni, ämopa.
 23 Mönö töniñacä Tïmoteo tee mönete wæyongante
 ñöwo ñimpö cædäni gocantapa, ante apænebo
 ëñeedäni. Tömengä botö weca quingæ
 pongä ïnique botö tömengä tönö guëa münitö
 weca ëñiacæ pömaïmönapa. 24 Mönitö beyæ
 apænedinque münitö ïmïnite në aadäni ïnänite,
 Waa quëwencæmïnimpa, ante apæneedäni. Ayæ
 adobaï Wængonguï quïnäni tömänäni ïnänite, Waa
 quëwencæmïnimpa, ante mönitö beyæ äedäni.
 Ayæ, Münitö ïmïnite ante apænedinque Itadiabæ
 quëwënäni adobaï, Münitö waa quëwencæmïnimpa,
 ante apænedänipa, ante ämo ëñeedäni. 25 Münitö
 tömämïni ïmïnite Wængonguï pönö waadete
 cæcæcäimpa. Mäninque ante yewæmömopa.

**Wængongui nänö Apænegaïnö
New Testament in Waorani (EC:auc:Waorani)**

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690